

*INDUAAAT NAARIKOO  
KANISA PEE EBULU  
(Vision Led church)*

*Inchere: Kaji kinko pee kiata induaat  
sidain naaret nkanisani ang pee ebulu?*

*Olaigeroni: Paul Highfield (Saruni Ole Ntaya)*

## *ILARETOK*

Cosmas Lemein, o lkulikae lalashera ootii entumo  
olarikok tolkoroi

### *ERISHATA NAIGEROKI O COPYRIGHT*

2007 (Second edition and printing 2008 nikirerioo  
2013) Ore Copyright naa enena ampuni naji Christian  
Restoration Ministries 3247 N. Nixon Ave.  
Springfield, MO 65803 USA. Eitobira (Printed by)  
ena ampuni: Evangel Publishing House, Nairobi,  
Kenya. Ore pee iyieu niyiolou enaipirta kuna bukui  
tisiraki Cosmas Lemein te box 110 Narok, Kenya,  
aashu email enye te cplemein@gmail.com. Ore  
nampa e simu enye naa: Safari com – 0725975651;  
Yu - 0754470706. Toliki sii ninye tinidol  
inkitapong'ot tiatua ena buku. Ore pee iyieu niliki  
Olaigeroni Paul Highfield shakenisho ino tenkaraki  
eretoto ena buku, indim aigeroki ninye te email enye  
te: prhighfield@mchsi.com. Ataasishore ina oshi  
Bibilia nikiata te Kimaasai.

## *IMBAA NATII ENA BUKU*

*ENASHĒ – Ing'orai enkardasi e 4*

*IMBAA NAAIPIRTA ENA BUKU - Ing'orai  
enkardasi e 5*

*EMATUA E DUKUYA – Enyamali naaipirta  
induaat nikjata o tipat pee kjata induaat  
Ing'orai enkardasi e 7*

*EMATUA E ARE – Olkitamanyunoto e  
nkíteng'enare e Biblia naaipirta induaat  
Ing'orai enkardasi e 16*

*EMATUA E UNI - Inkoitoi nikiaasishore pee  
kitum induaat sidain naaret kanisa nikimpanka  
imbaa e kanisa – Ing'orai enkardasi e 59*

*EMATUA E ONG'UAN - Inkítanyaanyukot  
naaret iyiook pee kidol kuna baa – Ing'orai  
enkardasi e 90*

*ENKÍTING'OTO – Ing'orai enkardasi 103*

## *ENASHE*

Kaata enashe oleng tenkaraki engolon naaisho Enkai pee aiger ena buku. Naata sii enashe sapuk oleng te Cosmas Lemein amu eisoma ninye ena buku nejur oleng. Meidimayu katukul pee aas ena siai tenemaata olaretoni laiyo ninye.

Naata sii enashe sapuk tenkaraki ina kampuni naji CMF amu atayiolo apa imbaa kumok naaipirta imbaa naatii ena buku eton atii tenebo ninche. Amu, ekiata apa olning'o too nduaat naaipirta esiai ang. Neaku, atayiolo ina oitoi naaipirta enkipankata naata induaat atii tenebo ninche.

Kaata enashe anaa oshi ake tenkaraki ilalashera laainei pooki ootii ina murua (clusta) Olkoroi. Amu, etaretutuo iyiook pee kirerioo ena buku. Neeta sii ninche induaat sidain naaipirta enkipankata e kanisa.

Ore sii anaa enajo oshi kaata enashe oleng tenkaraki enkitok ai Nadung'uenkop. Amu, kaaretu oleng tena ampuni ang. Ekiimaki imbaa pooki tenebo naaretu ninye oleng te siai naipirta imbukui naaipirare iropiyani. Naairiamunore oshi tenalotu Kenya olapa le ile. Kashipa sii tenkaraki ina ampuni naji "Faith Printing" naitobira ena buku. Kaata enashe oleng tenkaraki Angela Highfield amu ninye natoosho ina pisha natii enkomom olchoni lena buku. Neisho sii iyiook elakunoto pee kiasishore tena buku. Mikitamayiana Enkai oleng.

## *IMBAA NAAIPIRTA ENA BUKU*

Ore ena buku naa keipirta enikinko pee kitum induaat naaing'uaa Enkai nikimpanka sii imbaa e kanisa o mbaa enkishui ang tenkitoo Olaitoriani. Kejo Ilmaasai "*Kear olmoruo kitok kop eton*" aa inchere kedamu oltung'ani moruo imbaa naalakua naaponu. Neaku, kenare sii tenedamu kanisa imbaa naaponu netum induaat naaipirta embulunoto e kanisa.

Kaata osiligi ajo keretu ena buku intae pee ipuopuo dukuya aas imbaa enking'asia te kanisa o tenkishui inyi. Amu, ore pee kitum induaat oo nkipankat naaing'uaa Enkai nikitum enkirowuaj pee kias esiai Olaitoriani.

Taasishore ena buku pee itum enkoitoi nitum induaat naaishiakino kanisa ino o enkishui ino. Aisho intae inkitanyaanyukot kumok kake keyieu niomonono oleng pee itumomo tenkipankata naishiakino intae maate.

Matadamu sii aajo keidimayu pee kitum induaat sapukin nerikino iyiook kuna kutiti. Kenare sii nikiata induaat pee kias imbaa kutiti tenkoitoi sapuk. Metaa kintadou ate nikias sii imbaa kutiti tenkarna e Yesu anaa enataasa Yesu pee eitukuo inkejek oolkipaareta lenyena. Neaku, magira aliki intae enkoitoi pee iasiasa imbaa enking'asia pee itumutumu

olwuasa. Kenare nikias kuna baa pooki temborron e Yesu, naa ore pee eyieu neilepie iyiook nemetii enyamali.

Neaku, taasishore ena buku tenkoitai emborron, enyorrata, enkanyit, o eng'eno. Ore pee kias ina kaata osiligi ajo kemayian Enkai inkipankat ang.

## *EMATUA E DUKUYA*

*Kainyio enduaata o enyamali naaipirta induaat  
nikiata o tipat pee kiata induaat?*

### *Kainyio enduaata?*

Ore enduaata naa inchere tinikiata indamunot naibala naing'uaa Enkai naaipirta enayieu Enkai taata o enayieu sii Enkai toonkolong'i naaponu.

Naa keitoriori empukunoto Enkai o ina rishata nitii taata.<sup>1</sup> Nemegilunore ororei le Nkai. Naa keipirta intokitin ng'ejuko naayieu Enkai neasayu. Neaku, keipirta enkibelekenyata.

### *Enyamali*

Ore eton eitu kipuo dukuya matadamu kuna dung'eta erashe Olmaasai naajo, "*Imonko naaitadoiyio enkolong,*"<sup>2</sup> aa inchere ijo ias entoki kake mias. Neaku, kenare nikiro esipata aiuloki pee kirerioo imbaa. Kejo sii inchere, "*Meany enapiak eitoki aigil enetang'asa,*"<sup>3</sup> aa inchere maitobira imbaa tenakata pee meshukunye ake. Neitoki aajo inchere, "*Mincho meibung'a kirrabata,*"<sup>4</sup> aa inchere mataas eton ebaiki aashu eton sii elelek easata.

Ore embae e dukuya naa inchere ore tiatua isukuuluni tenkop Olmaasai nemeetae oshi inkoitoi

sidain naaretu iltung'ana menoto indamunot naaipirta imbaa ng'ejuko nemeetai. Ore te Kingeresa naa keji ina bae “creativity,” naa keipirta oltung'ani oipiru imbaa aashu matejo olaipirunoni. Ebaiki neibung inkera imbaa kumok too lukuny kake mme kumok inkiasin naaret inkera pee eshet ina toki naji “creativity” (enkipirunoto oo mbaa). Neaku, ore tenkaraki ina mesesh itum Olmaasani oipiru imbaa ng'ejuko nemeetai oshiake. Kepuo dukuya imbaa pooki anaa oshi ake. Idoorie oltung'ani oipiru imbaa aashu intokitin ng'ejuko kake mesesh itum.

Ata tiatua olkuak loo Lmaasai nemesesh itum iltung'ana oonyor oleng pee etem imbaa ng'ejuko hoo neidimayu pee etumi moobo. Etamoo olkuak oje neaku kepuo dukuya aasuj enoshiake oitoi. Tenkitanyaanyukoto, matejo ketii Olmaasani oata inkishu kumok kake ore nabo olong nedolu ajo kegira alotu olameyu. Neyiolou ajo ore pee elotu olameyu naa keidimayu pee eye inkishu kumok. Kake ore ake eyia meyieu nemir embata oo nkishu enyena pee epik iropiyiani embenki paa ore pee eishunye olameyu neitoki ainyiang'u inkulie kishu ng'ejuko. Keidimayu pee eishoru oltung'ani laijo ilo inkitolonyat kumok kake ore tesipata keipirta ina bae enkuretisho tenebo olwuasa.

Ore ai kitanyaanyukoto naa keipirta plot e kanisa. Ore kuna olong'i keeta inkanisani kumok mplooti enye. Kake meeta induaat pee easishore ina plot

teng'eno o tenkoitoni naret kanisa too larin ooponu. Kelusoo ilarin nemeeta enkipankata sapuk pee easishore plot tenkoitoni sidai. Neaku, ore pee metoni ilarikok le kanisa aaimaki ina bae nemeeta enaasayu. Anaata eimaki enkipankata sapuk pee epuo dukuya maa kutiti nepuo dukuya eeta induaat, nemeishoru inkitolonyat naaibooyo inkipankat. Amu, ore pee enyor Enkai enkipankata naje, nikinyok nikiomon, naa keasayu.

Ore enadolita naa inchere eewuo enkata pee kimbelekeny ina bae. Metaa kenare nikimbelekeny indamunot ang aaitaa ninche ng'ejuko pee kidamu imbaa ng'ejuko anaake nikitem sii nena baa ng'ejuko ti abori enkitoria e Yesu.

Nikiaku iloopiru imbaa ng'ejuko. Kesipa kejo Ilmaasai, "*Mepal oloitiko isirat,*"<sup>5</sup> kake kiyiolo pooki aajo keidimayu pee eibelekenyi imbaa tiatua Yesu aaitaa ng'ejuko.

**Kadolita sii ajo kenare netii ilairukok le Yesu dukuya teina bae.** Neaku, kenare neeta ilairukok le Yesu enkitieunoto pee edamu netem imbaa ng'ejuko. Kesipa kenare nikisuj nena baa musan naatii Bibilia kake ketii sii inkoitoni kumok oleng nemegilunore Bibilia naaret iyiook pee kimbung imbaa e Bibilia aitobiraki tena ishoi ng'ejuk.

Kiimakita too nkulie bukui Iroma 12: 1, 2 kake kayieu nikidamu kulo kererin sii tene. Keliki iyiook kulo kererin inchere kenare niking'ujuk indamunot ang pee kiyiolou eyieunoto e Nkai. Neaku, ore pee kiaku ilairukok niking'amu Enkiyang'et Sinyati nikimbung ororei le Nkai nikiuloki oleng enkomono, naa eikitum indamunot ng'ejuko nikiyiolou sii eyieunoto e Nkai te iyiook. Neaku, ekitem indamunot ng'ejuko kake ketii sii abori enkitoria Enkai.

Neaku, matonyok oleng pee kibol ilukuny ang o ndamunot ang pee kintang'ujuk ninche metaa keidimayu pee kidamu imbaa ng'ejuko enking'asia. Nikias imbaa kumok sapukin te ngolon Olaitoriani o tenkaraki enkitoo enye anaa enatejo Yesu te Matayo 17: 20, 21.

Ore ai bae naipirta ina bae naa keipirta **enkirukoto**. Anaata kipuoyie enkirukoto tiatua Yesu kake ore inkatitin kumok kisuj imbaa nikidolita ake. Ore pee mikidolita entoki aashu embae naje kijo meidimayu pee kitum aashu pee easayu. Kake etejo Paulo too Ilkorintio li are 4: 18, “... *amu mme kuna naalioo king'orita kake nena nemelioo. Ore kuna naalioo naa ne nkiti kata; ore nena nemelioo naa noo ntarasi.*” Kegira Paulo aimaki enkirukoto nagut oleng aa inchere kenare nikidamu anaake nena baa nemelioo. Naa ore pee kidamu nena baa nemelioo nikidamu sii imbaa ng'ejuko nikiindim aataas tena

kop naaibung'akino nena baa nemelioo naatii shu-mata.

Ore inkulie katitin naa ekiata sii oshi enyamali naijo ilo tung'ani oimaka Yesu te Matayo 25: 24-30 oata talanta nabo. Nejo, *“Nelotu sii elde oitaakaki talanta nabo nejo, ‘Lo Kitok, ayiolo ajo ira iyie oltung’ani ogol odung ineitu iun, ninturrur ineitu isuaaya. Neaku atureishe nanu nalo aturoo aisudoo ina talanta ino tiatua enkop, ing’ura, nena enino inko,’ Neng’amaa olkitok lenye ajoki, ‘Lo sinka torrono oshal, itayiolo ajo adung ineitu aun, nasotu ineitu aisuaaya; anaata naa inchoo ina pesai ai lelo oasisshore pee tenalotu natum enaai o kulie. Entooru naa ina talanta enchoo ilo oata talanta tomon. Amu ore pooki oata neponikini pee eaku naata kumok, kake ore olemeeta, ore ninye enda naata neoruni. Entanang’aki ilo sinka le meeeta tipat enaimin e auluo; neaku enkishirata o eonyoto oo lala.”* Ore entoki nareuta ilo tung'ani naa enkuretisho. Keyiolo ajo keyieu olkitok lenye dupoto te kuna pesai naaishooki ninye kake keure ninye oleng ajo ebaiki ore pee etem ajo aasishore impesai enyena nepong'ori. Neaku, etotona ninye tenchalan enye neitu enyok. Ore tenkaraki ina nelotu olkitok lenye neisikong ninye oleng neoru nena pesai naata ninye neisho ilo likae otaasishore impesai enyena. Neishoo-yie ake ilo sinka oshal inkitolonyat. Neiteleiki olkitok lenye entioto amu etejo era ninye *“oltung’ani ogol.”*

Kake tenaa keitanapa ninye olkitok lenye enaipirta enkoitoi anaata etusuja. Neaku, etiu anaa kejoito anaata etetema aasishore impesai enyena tenkoitoi naata dupoto alang teneisudoo ake.

Ore ina atini naa keeta tipat oleng naipirta iyiook taata. Amu, ore pee mikiaasishore ina ng'eno aashu inkishoorot naaisho Enkai iyiook kake kisudoo ake, naa kelotu enkolong nkinosu oleng. Naa ebaiki sii nemeasayu imbaa kumok sidain tenkaraki enchalan ang. Nemelo kanisa dukuya aitobiraki tenkaraki ina shalan. Neaku, matonyok oleng aatem imbaa ng'ejuko nikiasishore impesai, irishat, o nkishoorot ang te nkitieunoto o tenkitoo e Nkai pee eas Enkai imbaa enking'asia tenebo iyiook o te kanisa. Nikiaku iltung'ana kalamasi too naipirta inkiasin e kanisa. Matapal sii inkitolonyat nikiata. Amu keeta ilo tung'ani inkitolonyat pee measishore impesai enyena kake eitu eng'amu olkitok lenye nena kitolonyat. Netum ilo tung'ani enkitamioto sapuk oleng tenkaraki enchalan enye. Meyieu nening Yesu inkitolonyat ang kake keyieu nedol enyuaata ang. Ketii sii ilkulikae kererin ooitana iyiook pee kiasishore inkishoorot ang (1 Pet. 4: 10; 1 Ilkor. 12: 7; Efeso 4: 7).

Neaku, meeta ilo tung'ani induaat o enkitieunoto pee edamu netem imbaa ng'ejuko. Mera ninye olaipirunoni loo mbaa. Ore sii taata kelelek pee mikitem imbaa ng'ejuko tenkaraki enkuretisho. Nikitum inkitolonyat kumok pee mikias imbaa sidain.

Kake meyieue nening Yesu nena kitolonyat. Keyieue nedol enyuaata ang ake o enkitieunoto pee kitem imbaa. Kesipa keidimayu pee kipong'ori kake ketii Enkai tenebo iyiook naa kepalaki sii iyiook ti nikipong'ori nikirridu. Keikash oleng tinikinyok aapuo dukuya alang tinikitori tenchalan aashoru inkitolonyat anaake nimikias esiai Olaitoriani te mpijan. Kejo Ilmaasai, "*Merisio inyuat o nkidimat,*" aa inchere kenare nikipuo dukuya aanyok too mbaa Enkai.

Ore pee kiyieue nikitem imbaa ng'ejuko nikiaasi-shore sii inkishoorot ang, naa aisidai tinikinyok oleng pee kiata induaat sidain tenebo inkipankat sidain pee easayu imbaa. Ore pee mikiata induaat o nkipankat nemeeta enaasayu. Kepuo ilarin o larin nimikidol enkibelekenyata. Nerruoyo imbaa e kanisa neshalu iltung'ana te kanisa neshuko siadi. Kejo Ilmaasai, "*Meshukunoyu oloomi otashe,*" aa inchere kenare nikirerioo imbaa eton ebaiki amu kelotu erishata nemeitoki abaiki pee kirerioo. Aashu ebaiki nikidamu imbaa torrok ake aashu imbaa naagol naa ore pee kias ina ebaiki neponu nena baa nikigira aadamu amu kigira aaiuloki ninche anaake too ndamunoto ang. Etejo Ilmaasai, "*Meng'or ole Kutuk kulupuok,*"<sup>6</sup> aa inchere ore pee eimaki oltung'ani imbaa torrok anaake naa ebaiki neponu ninche naa ore pee eimaki imbaa sidain anaake neponu nena sidain. Keasishore shetani ina oitoi naipirta imbaa torrok pee eitashal

iyiook. Neitamodok iyiook pee mikidol enkoitoi sidai. Kake matonyok aapuo dukuya tengolon Olaitoriani, te nkirowuaj, te ng'eno, o te nkitieunoto, pee kishet enkitoria e Yesu tena kop neruko Enkiyang'et Sinyati anaa oreyiet aitemoo enkop pooki. Newang'u sii enkitoo Olaitoriani tena kop. Nikiaku iljeshi le Yesu oogol oopuo dukuya anaa enkima nagira anya enkop. Etaa erishata pee kinturraa enchalan ang niking'amu engolon Olaitoriani nikipuo dukuya te mbuakinoto sapuk oleng anaa iltung'ana loo Israeli apa pee eman enkanasa e Yeriko nebuak toltoilo sapuk nemir ninche tengolon Olaitoriani (Yoshua 6: 15-21). Neaku, ekijo tenkarna e Yesu ekipuo dukuya te ngolon e Nkai aasho Yesu enkishui ang pooki nikipal inkitolonyat pooki. Etaa erishata pee kiaku iltung'ana oopi lemeeta enking'ashing'ash. Nikiaku ilarikok le kanisa oata induaat naaing'uaa Enkai tenebo eyieunoto pee kisuj nena duaat. Amu, ore pee meeta kanisa ilarikok oata induaat nemebulu kanisa, naa ebaiki neshuko siadi. Kejo Ilmaasai inchere, *"Ore pee eshomo olowuaru entim enkiok ming'ani einosa,"*<sup>7</sup> aa inchere ore pee mikiata enkipankata naa ekipong'ori.

Naa kesipa inchere keibelekenya imbaa. Neaku anaata etii ilairukok dukuya too mbaa ng'ejuko sidain. Kejo Ilmaasai, *"Looibuko le kishon,"* aa inchere keibelekenya imbaa pooki. Neaku, matonyok pee kirik ilkulikae toombaa ng'ejuko sidain naaipirare

enkitoria Enkai alang tinikitori ake neibeleyenya  
imbaa te nkoitoi nemesidai.

## **EMATUA E ARE**

*Olkitamanyunoto e nkiteng'enare e Bibilia  
naaipirta induaat*

### ***Eyieunoto ang o eyieunoto Enkai***

Ore embae e dukuya naa inchere kenare nikidamu aajo ketii eyieunoto ang netii sii eyieunoto Enkai. Ore entoki nikiiyieu oleng naa kiiyieu nikiyiolou eyieunoto Enkai amu kejo Ndung'eta e Rashe 16: 2, ***“Ore inkoitoi pooki oltung'ani naa sidain too nkonyek enyena, kake Olaitoriani ninye oineneng oltau.”*** Naa etejo sii Yesu te Luka 16: 15, ***“... amu ore ina nailepie iltung'ana naa olminong too nkonyek Enkai.”*** Neaku, keidimayu pee kipong'ori iyiook tinikingarakino eng'eno o ndamunot ang ake.<sup>8</sup> Kenare nikiomon Enkai oleng pee kitum iltauja sidain nikitum indamunot sidain pee kiyiolou eyieunoto Enkai te iyiook anaa enalimu Iroma 12: 2. Kenare nikijo enajo Bibilia to Lkerempe le Nkai 40: 8 pee ejo, ***“Kang'ida nanu aas eyieunoto ino, Na Ai; etii enkitanapata ino atua oltau lai.”*** Aashu pee ejo, ***“Nteng'enaki nanu mataasa eyieunoto ino amu ira iyie Enkai ai!”*** (Olk. 143: 10). Aashu kiomon anaa enaiteng'ena Yesu iyiook pee ejo, ***“... meeu enkitoria ino, metaasi eniyieu te nkop anaa enatiu te shumata”*** (Mat. 6: 10).

Ore te Matayo 7: 21 kidol aajo keeta tipat oleng pee kias eyieunoto Enkai. Etejo Yesu, ***“Mme pooki tung’ani laajo ‘Olaitoriani, Olaitoriani,’ ojing enkitoria e Nkai, kake ilo oas enayieiu Papa lai otii shumata.”*** Neaku, ore embae naata tipat oleng naa tinikisuj enayieiu Enkai mme enikiyyieiu iyiook ake aashu enayieiu ilkulikai tung’ana. Etusuja sii Yesu eyieunoto e Papa lenye, ***“... amu atadowuo aing’uaa shumata neme pee alotu aas eyieunoto ai, kake eyieunoto eilo laairriwua”*** (Yhn. 6: 38). Neaku, ore enikiyyieiu oleng naa pee kias eyieunoto Enkai tiatua enkishui ang o tiatua inkanisani ang.

Ore pee kitii atua ororei le Nkai nikitii sii atua enkomono pee kias eyieunoto Enkai naa keidimayu pee kitum induaat pee kintabaya eyieunoto enye. Ore sii pee etii iyieunot ang abori enkitoria enye naa keidimayu pee etii iyieunot Enkai atua iyieunot ang. Metaa ore pee kiyieiu nikias embae naje tooltauja lang keidimayu pee easishore Enkai ina yieunoto pee eitabaya sii eyieunoto enye. Kake ore inkatitin pooki kenare nikirretena pee kimbelekeny inkipankat ang teneutaki Enkai iyiook ai oitoi naikash. Naa kenare nikidamu sii aajo ekias nena baa pooki tenkitoo Olaitoriani lang Yesu Kristo pee kishet enkitoria enye.<sup>9</sup> ***“Metaa ene Enkai naa Papa lang, enkitoo ntarasi o ntarasi. Esai”*** (Ilfilipi 4: 20; Ing’orai sii 1 Tim. 1: 17; Ilkolosai 3: 17).

Ore enyamali nabo naa inchere ore inkulie katitin kiomon pee kitum entoki naje kake ore tesipata kiyieu ina toki pee kiasishore tenkoitoy oong'urrat ang metaa mikiiyieu ina toki tenkaraki enkipirta sidai. Keimaki Yakobo 4: 3 ina pee ejo, ***“Iomonunu intae nimitumutumu, amu iomonunu te nkoitoy torrongo, pee itumokiki aaishang'itie too ng'urrat oo seseni linyi.”*** Neaku, ore pee kimpanka imbaa nikiata induaat, kenare nikidamu imbaa sidain naaipirta enkitoria Enkai alang tinikidamu ing'urrat ang ake. Tenkitanyaanyukoto, ebaiki nikiata enduaata pee kitum inkineji aashu inkishu kumok. Kake kerikino iyiook esiai e kanisa nikiasishore nena tokitin ake tenkoitoy ang ake pee kidupoyu. Anaata kisilig Yesu pee eliki iyiook inchere, ***“Enchooi pee eishori intae; aaisho emborei sidai narujakino, neiposhakino, o metadooi nepiki ilbenia too lgooitie linyi; amu ore ake ina nitemakinyenye ilkulikae naa ninye ake etemakinyeki sii ninche intae”*** (Luka 6: 38).

Ore embae e are naa inchere kenare nikisipu eyieunoto aashu enduaata naata Enkai te kanisa enye telulung'ata. Kainyioo eyieu Enkai neas te kanisa enye? **1.** Ore entoki naisul naa ketumi te Matayo 28: 19, 20 pee ejo Yesu, ***“Enchom entaa loreren pooki ilooiteng'eni laainei, nimbatisasa te nkarna e Papa o ene Nkerai o ene Nkiyang'et Sinyati; ninteng'ening'ene meibung'a inaitanapa intae pooki; naa***

*ng'ura, atii tenebo intae nkolong'i pooki o metabau enkiting'oto e nkop."*

Neaku, kejo kulo kererin keyieu Enkai intokitin uni: (1) Keyieu nikintaa iltung'ana pooki ilasujak le Yesu. Metaa keeta iltung'ana pooki eyieunoto o enkirowuaj pee esuj enkoitoi e Yesu. Meyieu nikidamu enkop ang ake kake keyieu nikiata enduaata naipirta nkuapi pooki (dunia pooki). Eitanapa Yesu ilkipaareta lenyena to Iasat 1: 7, 8 pee epuo aaku ilchakenini le Yesu o metabaike enkiting'oto enkop. Neaku, kenare niking'as aaiteng'en ninche enkoitoi enjeunoto pee eaku ilasujak le Yesu. Neyieu sii ina siai eng'iriata sapuk oleng pee kinteng'en iltung'ana aitobiraki pee meipidoki ina oitoi eton meyiolo enaikununo. (2) Ore pee kinteng'en ninche tenguton nerretena ninche, nikimbatisa ninche pee etum empalakinoto oong'ok netum Enkiyang'et Sinyati, nejing sii kanisa e Kristo (Ing'orai sii Iasat 2: 38; 1 Ilkor. 12: 13; Iroma 6: 1-3; Ilgal. 3: 26, 27; 1 Pet. 3: 21). Nikimbatisa ninche "*te nkarna e Papa o ene Nkerai o ene Nkiyang'et Sinyati.*" Naa ore pee ejo neijia naa kegira aimaki embae nagut oleng inchere pee kimbatisa iltung'ana pee ejing atua Yesu, Enkai o Enkiyang'et Sinyati. Amu, ore pee eimaki **enkarna** naa kegira aimaki inkorroki e ninche maate. (3) Nikintoki aaiteng'en ninche pee eibung inkitanapat e Yesu. Metaa kinteng'en ninche pee eibung enkoitoi e sinyatisho

amu keyieu Enkai nikiaku iyiook iltung'ana sinyat te dukuya ninye (Iroma 12: 1, 2; Efeso 1: 4; 1 Iلسes. 4: 3-8; 1 Tim. 4: 7). Nesipu tipat enkirukoto enye, enkirridunoto nasipa, tipat e kanisa, tipat pee kilikioo ilomon supati, tipat pee kiretu ilooshal, o tipat eramatare oontokitin pooki e abori enkitoria e Yesu.

2. Ore ai bae naisul nayieu Enkai naa keyieu nikiata **ENYORRATA NAGUT** (Mat. 22: 37-40) oleng naata enjurrunoto naipirta imbaa pooki. Ekinyor Enkai nikinyor sii ilkulikai tenyorrata naata enjurrunoto. Keliki iyiook Paulo ina bae te Filipi 1: 9 pee ejo, *“Ore enkomono ai naa inchere pee eponari enyorrata inyi oleng tiatua eyiolounoto o erishunoto oo mbaa pee itumutumu aatonyorrai ina naisula, niaakuku biyot, ilemeeta lewiat te nkolong e Kristo. Neboreyu intae ilng'anayio le supatisho, ooimu atua Yesu Kristo, neyau enkitoo o enkisisa e Nkai”* (Ilfilipi 1: 9-11). Keyieu nikijur sii imbaa pooki anaa enajo kulo kererin 1 Iلسes. 5: 21; 1 Yhn. 4: 1.

3. Keliki sii iyiook ororei le Nkai ajo keyieu Enkai **NIKISIS NINYE**, neaku keyieu netum ninye enkisisa. Ore enkisisa Olaitoriani naa keipirta enkishui ang pooki. Kisis ninye anaake te siai ang, te nkiyama ang, te kanisa, tialo inkera ang o nkulie rishata pooki. Naa keyieu Enkai nikisis ninye te Nkiyang'et o te sipata. Tisipu kulo kererin: (1 Intepen 16: 28, 29; Olk. 95: 6; 100: 1-5; Yhn. 4: 24; Iroma 12: 1,2).

4. Keyieu sii Enkai **NEIRRIDU** iltung'ana pooki anaa enalimu 2 Petero 3: 9. Neaku keyieu Enkai nejeu iltung'ana pooki anaa enatejo Paulo te 1 Timoteo 2: 3 o kulikai kererin anaa 1 Tim. 4: 9-10; Yhn 3: 17.

5. Keyieu sii Enkai **NIKIMBALUNYIE NG'OK ANG** anaake pee kitum empalakinoto oo ng'ok (1 Yhn. 1: 8-10; Yakobo 5: 16).

6. Keyieu sii **NIKIBULU TENKIRUKOTO ANG** pee meleji iyiook (Efeso 4: 11-16; Ilkolosai 1: 9-14; 2 Petero 1: 5-11; 3: 18).

7. Keyieu Enkai **NEIPUTI IYIOOK TENKI-YANG'ET SINYATI** nimikimera te naisho (Efeso 5: 17, 18).

8. Kiimakita ina kitanyaanyukoto natolimuo Yesu te Matayo 25: 14-30. Nikidol aajo **KEYIEU ENKAI NIKIASISHORE INTOKITIN POOKI NIKIATA PEE EPONARI IMASAA, ENG'ENO ANG AASHU INKISHOOROT ANG** (Ing'orai sii kulo kererin oopirta inkishoorot ang: 1 Tim. 4: 14; 2 Tim. 1: 6; 1 Pet. 4: 10). Neaku, keyieu nikiata enkitieunoto oo nduaat pee kias eyieunoto enye. Naa ekiyiolo aajo ore eyieunoto enye nabo naa pee kiasishore intokitin pooki naishoo Enkai iyiook. Ore enkoitoi nabo naret iyiook oleng naa tinikiomon oleng aaikilikuan Enkai pee eutaki iyiook induaat naanare nikisuj. Keomonoki Paulo iltung'ana le Efeso pee

**“eitawang”** Enkai iltauja lenye pee eyiolou eneba engolon Enkai te lelo ooiruko (Efeso 1: 18, 19).

**9. Keyieu sii Enkai NIKIDAMU OLENG ILTUNG’ANA LEMEIDIM ATE.** Ketii ilkererin kumok oleng ooliki iyiook enaipirta ina bae (Is. 58: 1-11; Yer. 7: 5-8; Olk. 69: 33; 82: 3, 4; 113: 7-9; 138: 6; 140: 12; Ndung. 10:4; 17: 5; 19: 17; 20: 13; 22: 2, 9, 22; 28: 27; 29: 7; 31: 9, 20; Lawi 19: 9-10; Enk. 10: 18, 19; 14: 28,29; 16: 11; Luka 14: 12, 13; Iasat 6: 1-6; 2: 45; 9: 36; 24: 17; Iroma 15: 26; 1 Ilkor. 11: 20-22; 2 Ilkor. 9: 6-15; Ilgal. 2: 10; Yakobo 1: 27; 2: 1-7, 15-17; 1 Petero 4: 7-11).

**10. KEYIEU ENKAI NEASISHORE KANISA PEE EIBALAYU ENKITOO ENYE.** Ore kanisa kewon naa ketii apake atua enkipankata Enkai anaa enajo Efeso 3: 10, *“... nchere to rrekie le sirit eboluni taata eng’eno enye oo mpukunot kumok metayiolo laitoriak o enkitoo pooki too wuejitin e shumata.”* Neaku, mme entoki ng’ejuk kanisa. Ore apa oleng keeta Enkai enkipankata pee etii kanisa. Neaku, keyieu Enkai neaku pooki ng’ai olairukoni le Yesu nejing kanisa.

**11. KEYIEU SII ENKAI ERIKORE SIDAI TIATUA KANISA.** Keliki iyiook embuku oo Iasat 14: 23 enaipirta ina bae pee ejo, *“Ore pee egelaki ninche ilpayiani te sirit ake pooki, neomon eitupukoo ate, neomonoki ninche Olaitoriani, ilo laa ninye eiruko ninche.”* Neitanap sii Paulo Timoteo

pee egelu ilarikok ooitashiiki kanisa te Krete, nejo, *“Enkaraki ena pee aatung’uayie te Krete, pee itum aitobira mbaa naang’or, nigelu ilpayiani too nkang’itie pooki anaa enaatuutaka...”* (Tito 1: 5). Nelo Paulo dukuya alimu impukunot nairirikino olarikoni le kanisa. Nelimu sii imbaa naaipirta ilarikok ooyieuni te 1 Timoteo 3: 1-13. Tisipu sii 1 Petero 5: 1-4 pee eliki Petero ilarikok pee eas esiai enye toltau sidai anaa olchekut. Nemeng’uar impesai. Neeta enkirowuaj pee eas esiai Olaitoriani. Nemeisimaki iltung’ana imbaa kake keaku enkitanyaanyukoto sidai pee esuj sii ninche.

**12. KEYIEU ENKAI NIKIATA SII ELAKU-NOTO** anaa enajo Paulo tembuku o Lgalatia 5: 1, 13; Ing’orai sii 1 Petero 2: 16. Kake kiasishore ina lakunoto pee kisiai nikiretu ilkulikai mme pee kias ng’ok (Ing’orai sii Iroma 7: 6; 1 Peter 3: 1-7). Naa kelotu elakunoto nasipa tinikisuj enkoitoi e Yesu o tinikimbung esipata anaa enatejo Yesu te Yohana 8: 31, *“Tintonini to rorei lai nirara ilooiteng’eni laainei oosipa; naa iyiolouu esipata; nelaku intae esipata.”* Amu ore pee mikitii atua Yesu kira isinkan loong’ok (Yhn. 8: 34). Eton eidimayu pee kigelu enkoitoi e Yesu te retoto Enkai kake ore pee kitoni tiatua ng’ok ang nikiaku isinkan loong’ok. Kenare nikincho Enkai enkitoria tiatua enkishui ang metaa kiaku isinkan le supatisho anaa enajo Paulo te Roma 6: 15-23.

Ore pee etii oltung'ani atua Yesu era ninye oltung'ani olakuno ata tenaa ketii atua errindikisho. Kake ore pee etum erishata pee etum elakunoto neme torrono teneas ina (1 Ilkor. 7: 20-24). Matadamu sii ajo ketii sinkaisho oompukunot kumok. Keidimayu pee etii sinkaisho tiatua enkiyama naje tenkaraki ketii inkituak kumok nemetii enyorrata o seriani atua ninche. Aashu, ketii olarrabal anaake atua enkiyama naje. Aashu ebaiki netii enkidong'oto sapuk atua enkiyama naje. Aashu keidimayu pee etiu esumash anaa esinkaisho. Aashu aisinanisho. Keidimayu pee etiu nena pooki anaa sinkaisho. Etejo Yesu kewon eewuo ninye pee eisho iltung'ana elakunoto (Luka 4: 18-19).

**13. KEYIEU ENKAI NIKIATA ENKISHUI SIDAI “TE NKIPUTAKINOTO.”** (Yhn. 10: 10). Kake ore ina kishui naa meipirta ena kop ake. Keipirta iltauja lang. Neipirta empalakinoto oong'ok. Neipirta eseriani. Neipirta enkiputakinoto sidai nikiata tiatua Yesu metaa ore Yesu naa endaa ang. Ore Yesu naa enkishui ang. Ore Yesu naa ninye kinturukie too mbaa pooki. Ore pee kiata enyamali king'as aapuo enetii ninye aaomon Enkai pee kitum ewalata aashu enkilejilejata. Metaa mikipuo aaing'oru oloiboni aashu enaisho, eloloito aashu empurrorre.

**14. KEYIEU ENKAI NETII ESIPATA (JUSTICE) TE POOKI WUEJI -** (Tisipu kulo kererin pooki: 2 Ilses. 1: 6-10; Luka 18: 1-8; Malaki

3: 5; Is. 5: 16; Olk. 9:8; 11:7; 89: 14; 103: 6; 140: 12). Naa keyieu Enkai nikisuj sii enkoitoi esipata too ltung'ana pooki (Amos 2: 7; 5: 15, 21-24; Enkigilata oo Nkitanapat 16: 19-20; 24: 17-18; 27: 19; Is. 1: 12-17; Yeremia 7: 5-8; Sakaria 7:9; Luka 11: 42; 1 Yhn. 3: 7; Mika 6: 8; Is. 1: 17). Ore enkoitoi nikimirie enkironya te nkop naa pee kisuj enkoitoi olng'ur anaa Yesu (Matt. 12: 15-21).

**15.** Ore entoki naata tipat oleng naa inchere **KEYIEU ENKAI NIKIYIOLOU NINYE.** Ore embae e dukuya naa pee kiure aashu kiyanyit Enkai oleng anaa enajo Ndung'eta e Rashe 1: 7, “*Ore euriata o Laitoriani naa ninye enkiterunoto e ng'eno; eany ilmoda eng'eno o utarot.*” Neponaa sii ai Dung'et e Rashe, “... *naa ore eng'eno e ilo Sinyati naa eng'eno nagut*” (9:10). Keyieu Enkai neiput enkop eyiolounoto o Laitoriani anaa enajo Isaya 10: 9, “... *amu keiput enkop eyiolounoto o Laitoriani anaa enaiputa nkariak enaiposha.*” Ore pee metii eyiolounoto nelotu enyamali sapuk anaa enajo Enkai te Hosea 4: 6 naipirta Israel, “*Eidaikieki iltung'ana laainei te nkaraki emodai nemeeta eng'eno enkaraki nitanyaita intae eng'eno...*” Ore pee mikimbung eyiolounoto (aashu eng'eno, enkanyit) Enkai naa kerruoyo indamunot ang nikias imbaa kumok torrok anaa enajo Paulo te Roma 1: 28, “*Naa ore amu eitu edol ninche aajo keishiaakino neyanyit Enkai, neing'uaa Enkai ninche metaa, keriatu indamunot*

*enye netum olkuaak torrano.*” Keyieiu nikibulu te yiolounoto Enkai anaa enajo Paulo to Lkolosai 1: 10.

Neyieiu sii Enkai nikiyiolou Yesu amu etejo Bibilia te Efeso 4: 11-14 inchere eipanka Enkai pee eeta kanisa ilarikok pee eiteng'en ilkulikai pee eas esiai Olaitoriani, “... *o metabaiki pooki naboisho naimu enkirukoto o eyiolounoto e ilo Inoti le Nkai, nikiaku iltung'ana ootubulutua aamitunye, aabaiki entemet e mbotoro nalulung'a e Kristo; pee mikintoki aaku inkeru, naanang'ari idie o idie to lkatati ake pooki le nkiteng'enare, o losek loo ltung'ana tiatua esunkureisho o losekin le lejare.*” Etejo sii Paulo inchere ore tiatua Yesu ketii “... *masaa pooki sidain e yiolounoto o eng'eno*” (Ilkol. 2: 3). Nejo sii 2 Petero 3: 18, “*Kake entubulu te mpiris o te yiolounoto o Laitoriani naa Olaitajeunoni lang Yesu Kristo. Metaa enenye enkitoo te pokira, taata o metabaiki ina olong oo ntarasi.*” Nejo Paulo to Lfilipi 3: 10, “... *pee ayiolou nanu ninye o engolon e mpiunoto enye, nang'arie olosilisili lenye, atiu anaa ninye tiatua enkeeya, paa teneidimayu natum mpiunoto aing'uaa ilootuata.*”

Neaku, kenare nikiata induaat sidain pee kiata enkiteng'enare nagut pee kiyiolou Enkai o Yesu (Ndung 2: 1-5). Nikinyok sii te nkishui ang pee kiomon anaake nikisilig ninye too nkatitin pooki. Ore pee eponu intemat niking'amu nena temat te nkoitoi naret iyiook pee kiyiolou Enkai o Yesu te nguton.

Ore pee kiyiolou Enkai neyieu sii Enkai nikimbalunye eyiolounoto Enkai pooki wueji anaa enajo Paulo to Lkorintio li are 2: 14, ***“Kake ashe te Nkai, narik iyiook maisula anaa ake te Kristo, neasishore iyiook maibalunye e yiolounoto e Kristo pooki wueji anaa esonkoyo narropil.”*** Ina pee enare oleng tinikilikioo ororei le Nkai nikiun sii inkanisani te nkop Olmaasai. Kenare nikiata induaat sapukin naaipirta inkoitoyi nikiasishore pee kinteng’ en iltung’ana leitu eiruk nikinteru sii inkanisani.

## ***Enkirukoto***

Kainyioo enkirukoto? Keliki iyiook embuku o Lhebrania 11: 1 enaikununo enkirukoto. Keliki iyiook inchere, ***“Ore enkirukoto naa ninye naitadedeyie intokitin naaisiliguni, naa ninye enkitisipata e nena tokitin nemeloo.”*** Neaku, kiata osiligi oleng ajo ketii aashu keasayu embae naje ata tenaa melioo. Kiyiolo aajo ketii Enkai, Yesu, o Enkiyang’et Sinyati. Nikiyiolou aajo ketii empiris, enyorrata, netii sii ewueji netii Enkai. Nikiyiolou aajo ketii Enkiyang’et Sinyati atua iyiook. Nikiyiolou aajo ketii Yesu tenebo Enkai naa keshukunye kenya ake.

Kake ore kiasita esiai Olaitoriani kenare nikidamu sii esiai enye te nkoitoyi enkirukoto. Metaa kenare nikidamu imbaa nemeloo tenakata kake keidimayu pee easayu tengolon o te yieunoto Enkai. Tenki-

tanyaanyukoto, ebaiki eton metii kanisa te wueji neje kake ore pee kiomon Enkai nikidamu enelakua too nduaat naa keidimayu pee kiata osiligi oleng ajo kelotu enkolong nabo pee etii kanisa tine wueji. Naa ore pee kitum induaat naaijo nena nikitum sii enkirowuaj pee kinyok aipanka imbaa pee easayu ina. Kake ore pee mikiata enkirukoto naipirta ina bae, nemelioyu nemeasayu katukul.

Kayieu nikidamu iltung'ana li apa oata enkirukoto kake kayieu niking'as aadamu enatejo Yesu te Matayo 17: 14-20. Etalaikinote ilkipaareta le Yesu aaishiunye olayioni omuei neponu ninche enetii Yesu neikilikuan ninye aajoki ainyioo pee meidim ninche aaishiunye ninye. Nejo Yesu, ***“Enkaraki naa kiti enkirukoto inyi, amu esipa ajoki intae, tiniaatata enkirukoto naba anaa ene kantererai naji karadali, naa indimidimi aatiaaki ele doinyo ‘Tadotunye tene, shomo idie;’ nedotunye; nemetii embae nemeidim-ayu te intae. Kake mepuku eneeijo ena mme te nkomono o te mpukoroto”*** (Mat. 17: 20, 21). Kesipa ajo meidimayu pooki toki te iyiook kake kegira Yesu aaimaki embae nagut naata tipat oleng tene. Kejoito inchere ore pee kiata enkirukoto naa keasayu imbaa kumok oleng alang tinimikiata. Amu ore pee kiata enkirukoto nikitum sii induaat nikitum engolon pee kisilig Enkai nikitum sii engolon pee kinyok. Nikiretu Enkai pee easayu ina bae. Enkai naata engolon kake kenare nikinyok sii iyiook. Etejo Yesu ore embae

naretu ilkipaareta pee etum enkirukoto naa enkomono o empukoroto. Neaku, ore pee kisilig Enkai te nkomono nikiany sii ate aaiturukie imbaa Enkai, naa keidimayu pee easayu imbaa kumok oleng nemeasayu oshi ake. Neaku, ketii imbaa kumok oleng nemeasayu tenkaraki enchalan ang. Mikiata enkirukoto nadupa. Naa ekisiligita sii oleng intokitin naalioo. Ketii imbaa kumok oleng naagol tena kop kake ore pee kinturukie enkirukoto naa keidimayu pee kimir imbaa kumok naagol tengolon Enkai. Naa ore pee mikiata enkirukoto netum Enkai enyamali te iyiook. Nemeshipa ninye anaa enemeshipa Yesu tenkaraki ilkipaareta lenyena (Mat. 17: 20; Ilheb. 11: 6).

### *Iltung'ana li apa ooata enkirukoto*

Matang'as aadamu NOA. Keliki iyiook Ilhebrania 11: 7 inchere, ***“Te nkirukoto eitatala Enkai Noa nena baa apa neton melioo nening ninye neitobir esafina pee esaru enkaji enye; tena bae etudung'oko enkop enkiguana neaku ninye olajung'oni le supatisho natumi te nkirukoto.”*** Eiruko ninye Noa Enkai tenkirukoto hoo nemelioo ina olong torriono. Kake eshomo dukuya ashet esafina anaa kedolita ina olong. Kajo kegira ninye adamu oleng ina olong. Nedamu sii ajo kenyor olmarei lenye oleng nemeyieu netum ninche ina kiting'oto torriono. Ebaiki negira sii adamu kewon pee meye tenelotu ina shan sapuk.

Kake keibala ajo keeta ninye induaat naaipirta ina olong torrongo. Neng'iri sii ilarin kumok oleng eton meshaita. Naa kegira adamu sii ilkulikai amu kegira aliki ninche ajoki kelotu ina olong kake eitu ening ninche ninye. Ore pee elotu ina olong eterretene ninye pee eitajeu kewon tenebo olmarei lenye o ng'uesin sii. Kake eidaaitie ilkulikai tenkaraki ne-meeta enkirukoto. Kegira ninche aaisilig imbaa naalioo.

**Ore enkisoma te iyiook taata naa pee kisilig Enkai oleng te kirukoto niking'iri kigira aanyu metaasata imbaa o metabana nicias ina siai nayieu Enkai.** Nikinyok oleng aaliki ilkulikaee pee eata sii ninche enkirukoto. Tena ekiiyieu nikishet enkaji naje te nkirukoto pee kiretu kanisa, naa eisidai oleng. Tinikiyieu niciasishore imasaa ang tenkoittoi enkirukoto pee elo dukuya enkitoria Enkai te nkop, ekias sii ina. Tinikiyieu nikiun inkanisani naata esiana naaje nicias tenkirukoto. Neaku, matonyok pee kipuoyie enkirukoto amu ore pee kias ina naa ekintajeu ate nikintajeu sii ilkulikaee.

Matadamu sii **ABRAHAM** otudumunye alo ewueji nemeyiolo eneloito tenkaraki enatejo Enkai. Neisilig Enkai pee eutaki Enkai ninye anaake ewueji nelolo. Nemeibala tedukuya enaasayu aashu ewueji nelolo ninye. Kake eshomo dukuya inkolong'i pooki te nkirukoto eisiligita Enkai (Ilheb. 11: 8-10).

**Ore enkisoma te iyiook taata naipirta Abraham naa inchere kenare nikining oltoilo lo Laitoriani nikipuo dukuya aasuj ninye ata tenaa meibala pooki toki tenakata.** Amu, ebaiki neyieu Enkai neng'as adol eyieunoto ang eton eitu eibalakinyie iyiook inkulie baa. Naa menare nikincho enkuretisho metimira iyiook metaa mikipuo dukuya. Neaku, mataasishore ina kiti wang'an nikiata nikipuo dukuya kisiligita Enkai pee eutaki iyiook enikipuo taaistere. Kake kinyok sii iyiook pee kimpanka imbaa nikipik induaat, alang tinikipuo dukuya tenchalan nimikidamu imbaa ng'ejuko o nkoitoi ng'ejuko nikiasie esiai Olaitoriani.

### ***Kenare neeta enkirukoto enkipirta.***

Ore ai bae naipirta enkirukoto e Abraham naa inchere keeta enkirukoto enye enkipirta metaa kegira ninye adamu ina anasa natesheta Enkai (Ilheb. 11: 10). Neaku, ore tenkarako ina enoto engolon o enkitieunoto pee esuj enkoitoi Enkai ata tenaa kegol oleng nemeyiolo eneloito. Kelo dukuya ina buku o Lhebrania nejo, ***“Tenaar kenkop apa natung'uitie edamu ninche, anaata apa enoto erishata nashukore. Kake ore anaa enatiu, ae kop eyieu sidai teina, naa ene shumata”*** (Ilheb. 11: 15, 16). Neaku, tenaa kegira adamu Abraham imbaa enkop anaata eitu esuj oltoilo lo Laitoriani. Kake kegira ninye adamu

imbaa Enkai metaa ore pee etum ninye inyamalaritin tena kop aashu medolita imbaa pooki, naa eton eisilig Enkai. **Kake kesipa sii inchere ekishal** pooki amu ketii enkata nashalu sii Abraham pee eng'amu Haga anaa enkitok enye neboitare ninye nenutayu Haga neiki Abraham olayioni. Etejo Abraham o Sarai ketum ai oitoi pee etum enkerai amu eton eitu easayu enatejo Enkai inchere keisho Sarai eiu olayioni. Neaku etashala ina kata nedamu imbaa enkop alang imbaa Enkai.

Neaku, maape dukuya te nkirukoto nikireiki imbaa Enkai pee kitum engolon nikitum sii induaat sidain. Nikipuo dukuya aas esiai Olaitoriani tengolon o tenkipirta Enkai. Ore pee elotu erishata naishiakino neibalayu enayieu Enkai te iyie oleng tinilo dukuya taata asuj eyieunoto enye anaa eniyiolo.

### ***Keponu intemat naagol tiniki puoyie enkirukoto.***

Ore nabo olong netum Abraham entemata nagol oleng. Neitanap Enkai ninye pee epolos olayioni lenye aita olasar. Metaa etiaaka Enkai ninye pee ear ninye metua metaa ninye olasar te Nkai (Enkiterunoto ematua e 22; Ilheb. 11: 17). Nening Abraham oltoilo le Nkai nelo dukuya asuj enatejo Enkai o metaba anaa neaku oldakikai obayie. Ore ina bae naa kegol oleng amu eitanapa Enkai ninye pee eas embae torrongo oleng. Neaku, anaata etejo ninye maas ina amu

eitorrono oleng. Kake keeta ninye enkirukoto oleng neyiolo te sipata ajo etoning’o oltoilo lo Laitoriani. **Ore pee kipuo sii iyiook dukuya aasuj enkoitoi enkirukoto naa keponu imbaa naagol oleng naatem iyiook.** Ebaiki nikining aajo kegira aliki Enkai iyiook pee kintarasaki ninye entoki naata tipat oleng te iyiook pee elo dukuya esiai enye. Kelelek pee king’aing’ai nimikisuj enatejo Enkai. Tenkitanyaanyukoto, ebaiki nining ajo keyieu Enkai nimir enkiteng pee iretu esiai e kanisa kake ore pee elotu erishata pee ias ina nitum enkuretisho nipal. Amu, idamu imbaa ena kop nimisilig Enkai pee kirammat iyie tinias ina. **Neaku, matonyok pee kisilig Enkai inkatitin pooki ata tenaa keponu intemat naagol oleng.** Kejo Ilmaasai, “*Eima aras e kimojik,*”<sup>10</sup> aa inchere ore pee eponu imbaa naagol keidimayu pee kitum enkoitoi. Nikiponaa iyiook ilairukok aajo “te retoto Enkai.”

***Ore inkulie katitin ore enkoitoi enkirukoto naa enkoitoi nagol aisul alang ai oitai naje nalelek.***

Ekidol ina sipata tiatua enkishui e MUSA. Amu, etii Musa apa enkaji e Farao enetii karsisisho sapuk. Neaku, anaata etotona ninye tine wueji aitemurru intokitin sidain alang tenelo aing’uua ina kop asuj enkoitoi nagol oleng ti ong’ata (Ilheb. 11: 24-27). Neaku, ore sii ninche iyiook anaata kijur oleng

nikiomon oleng pee kisuj enkoitoi Enkai aashu enkirukoto nasipa alang enkoitoi nalelek aashu enkoitoi naata dupoto e nkop ake. **Ore inkulie katitin ore enkoitoi nalelek naa keitarroo enki-shui ang tenkiting’oto.** Naa keidimayu pee erruoyo sii entoki naje tenikishet tenkoitoi nalelek ake. Tenkitanyaanyukoto, ebaiki neshet oltung’ani enkaji sapuk kake kesuj enkoitoi nalelek pee eshet olkitamanyunoto. Kainyioo naasayu? Ebaiki nelotu osiwuo sapuk neya enkaji aashu ebaiki ore pee esha oleng neimis enchoto enkaji tiatua enkop. Etuata iltung’ana kumok tenkaraki iltung’ana otaasishore enkoitoi nalelek pee eshet inkajjik sapukin. Kegira ninche aadamu iropiyiani alang enkishui oltung’ani.

*Ore sii too nkulie katitin naa kemanita iyiook inyamalaritin. Ketii siadi netii dukuya netii nchot pooki, kake ore eyia neijia eton eishiakino tinikipuo dukuya te nkirukoto kisiligita Enkai.*

Matadamu enkatini naipirta **ISRAELI** apa pee elang enaiposha nanyokie (Enaidurra imatuan 14-15; Ilheb. 11: 29). Ore te siadi ninche etii iljeshi le Farao. Ore te dukuya ninche netii enaiposha nanyokie.

Neaku etii ninche ewueji negol oleng. Meidim aashom siadi nemeidim aashom dukuya. Etiu anaa ina kiroroto najo Ilmaasai, “*Ekimiru taa ake olarro nikimiraki enetii emuny.*” Keponu oshiake inkatitin

naagol oleng metaa mikiyiolo enikias nemelelek ewalata. Nejo sii Ilmaasai, “*Erisio laikin o keeya,*”<sup>11</sup> aa inchere or inkulie katitin kegol inkoitoi pooki. Neaku, ore pee kipuo dukuya te nkirukoto keidimayu pee elotu erishata namanita iyiook inyamalaritin kumok too nchot pooki. Kake ata tenaa kelotu enkata naijo ina eton eishiakino pee kisilig Enkai pee eutaki iyiook enkoitoi aashu ewalata alang tinikirut niking’-unyung’uny ninkinturraa enkoitoi enkirukoto anaa embata e lelo tung’ana le Israel apa (Enaidurra 14: 10-20). Kake ore pee kisilig Enkai niking’iri naa keutaki Enkai iyiook enkoitoi pee kimir inyamalaritin pooki.

Eitanapa Musa iltung’ana le Israel ajoki, “*Emiu-reishoyu, entasheito tukul, metii olng’ash pee idolidolo enjeunoto o Laitoriani, naitobiraki ninye ntae taata; amu ore kulo Misiri idolitata taata, mintokiki ai kata aadol. Kemitu intae Olaitoriani, metaa entirring’ata*” (Ena. 14: 13). Nelotu enjeunoto Olaitoriani. Nerrip Olmalaika o enkatampoi ninche pee menyikaki ninche Iljeshi le Farao. Neor Enkai enaiposha te dukuya pee eim. Neim ninche kake ore pee esuju ninche Iljeshi le Farao neisho Enkai enkare metushukunye aar ninche pooki metuata (Ena. 14: 21-31). Nejo Bibilia te naipirta iltung’ana loo Siraeli, “*Nedol Israeli esiaai sapuk naitaasa Olaitoriani Ilmisiri, neureyu iltung’ana Olaitoriani; neiruk nin-*

*che Olaitoriani o olaisiaayiani lenye Musa” (Ena. 14: 30, 31).*

Neaku, matadamu pee kisilig Enkai nikipuo dukuya te nkirukoto ata tenaa kerrish oleng imbaa nemanita iyiook nyamalaritin too nchot pooki. Nejo Bibilia to Lkorintio le dukuya 10: 13, *“Eitu einepu intae ai temata nemetiu anaa noshi ake naatum ilkulikae tung’ana. Keisiligayu Enkai, nemeisho ninye metetemi intae enalang ina nimindimidimi aairisha, kake ore ake entemata nalotu neisho ake intae enkoitoi nipaashieshie pee itumutumu aairisha.”* Kesipa oleng ajo keretu Enkai iyiook too nyamalaritin pooki tinikisilig ninye. Ore pee kipuo dukuya te nkirukoto nikitum induaat sidain. Nemenyor shetani ina neaku keing’oru inkoitoi kumok pee emir iyiook. Kake matonyok pee kisilig Enkai too nkatitin pooki nikipuo dukuya aaing’oru induaat sapukin pee kias esiai Olaitoriani tengolon Enkai o te mirishoi. Naa ore pee etii nena nyamalaritin kenare nikedamu ninche anaa irishat pee kibulu tinikimir ninche tengolon Enkai amu kejo ororei le Nkai te mbuku e Yakobo 1: 2, *“Ilalashera laainei, enkenai inchere eng’ida, tenitumutumu intemat oo mpukunot kumok, amu iyiololo inchere ore entemata natemi enkirukoto inyi eyau eng’iriata. Ning’iriri metabaike enkiting’oto pee iakuku ilooiputakinote nelulung’a neitu eng’oriki toki.”*

*Ore pee kipuo dukuya tenkirukoto naa kelotu erishata metaa kenare pee kisuj enkoitoi nemeeta tipat too nkonyek oolkulikai lemeyiolo Yesu.*

Ore apa tenkata e **YOSHUA** eitanapa Enkai ninye pee elo ninye tenebo Israeli aya enkanasa naji Yeriko (Yoshua 6: 1-27). Ore embae nayieu nikidol tene naa inchere ina oittoi naitanapa Enkai ninche pee easishore pee eya ina anasa. Neitanap ninche pee epuo aaman enkanasa neosh imowuarak nebuak sii. Neaku, ore ina oittoi naa etiu anaa enenkiushoto aashu entoki nemeeta tipat. Amu, keeta Iljeshi le Yoshua inkulie oittoi kumok pee emir lelo tung'ana. Tenkitanyaanyukoto, ainyoo pee meidimayu pee easishore ninche kulo keek sapukin ooji te Kingeresa "battering rams" (Ing'orai Yer. 6:6) pee eked isunta enkanasa aashu pee egilie imilankoni enkanasa anaa enaas oshi ake ilkulikai jeshi? **Kajo nanu keyieu Enkai neitodolu enkitoo enye neaku etaasishore enkoitoi nashal nemeeta tipat too nkonyek oo ltung'ana.**

Ore pee kisuj iyiook enkoitoi enkirukoto tiatua kanisa o te nkishui ang kira ilairukok naa ebaiki neutaki Enkai iyiook enkoitoi nashal nemeeta tipat too nkonyek oo ltung'ana lemeyiolo Yesu. **Kake ore pee kisuj ina oittoi nelotu engolon Enkai neibalayu enkitoo enye te nkoitoi enking'asia.** Tenkitanyaanyukoto, ebaiki neutaki Enkai iyiook pee kipukoo

aaomon ninye pee kitum induaat sidain aashu pee kias esiai naje Olaitoriani aitobiraki tengolon enye. Naa ebaiki nejo ilkulikai lemeyiolo Yesu meeta tipat ina aashu kijoki itomode. Kake kiyiolo aajo keeta tipat too nkonyek Enkai neaku ekias tenkirukoto o to siligi. Aashu ebaiki nikirem Enkai oltau lino pee imir enkiteng ino pee iretu esiai e kanisa. Ore pee edol ilkulikae lemeyiolo Yesu ina nikijoki, “Kaa iasita? Amu etiu anaa itimira ina kiteng pesho. Amaa itomode?” Kake ebaiki neretu ina kiteng oleng kanisa neiruk iltung’ana Yesu tenkaraki ina retoto.

### ***Enkirukoto, osiligi, o enyorrata***

Kindipa aaimaki enkirukoto kake kayieu nikipuo dukuya aaimaki osiligi o enyorrata. Etejo Paulo te mbuku o Lkorintio le dukuya 13: 13, “***Ore naa, ebik kuna pokira uni: enkirukoto, o silig, o enyorrata; kake enyorrata esapuk aisul pooki.***” Etejo oltung’ani obo enaipirta nena pokira uni inchere, “Enkirukoto nikinuaki enkima emirishoi, naa osiligi likintobik tiatua emirishoi, neitisiny enyorrata emirishoi.<sup>12</sup> Neaku, ore enkirukoto naa enkiterunoto amu ore pee metii enkirukoto mepuo imbaa dukuya aitobiraki. Keeta sii tipat oleng osiligi. Amu, ore pee etii osiligi ketum oltung’ani engolon pee elo dukuya. Kake ore pee metii osiligi neisininuo oltung’ani nepalari. Kejo

Ilmaasai, “*Menyaanyuk osiligi opala.*” Keikash oleng osiligi alang tenepalari oltung’ani.

Atoning’o enkatini naipirta embarta nabo namuoi oleng kake ore emuoiyian enye naa etiu anaa emuoiyian oltau. Ore oshi pee enyikaki iltung’ana ninye netum engoro neirut neyieu neony ninche. Naa ketii olmarei obo oata esiai naipirta imbartan naata enyamali naijo ina. Nepuo ninche ainyiang’u ina barta aya enkaji enye. Naa keeta sii ninche ai siai naipirta intoyie naamuoi. Ore sii ina muoiyian oontoyie naa keipirta iltauja lenye metaa meshipa aashu matejo keisininuo katukul. Ore pee eyau ina barta enkaji enye nelo entito nabo namuoi asipu ina barta. Neton ninye tembata emilanko aing’or ninye oleng. Netum olng’ur sapuk nebol emilanko nejing olgilata lenye. Amu, eirraga ina barta tolgilata lenye anaa entoki nashal oleng nemeeta osiligi. Neirrag tenkop ake tenetii barafu (endeem). Nelo ina tito airrag tine wueji ataaniki ninye. Ore pee elusoo enkiti rishata nedumu ina barta elukunya enye nedol ina tito. Ore pee edol ina tito netiu anaa kenoto eseriani tiatua oltau lenye ina kata neitoki airura aitobiraki. Neiteru ina barta aishiu amu enoto olchore netum sii osiligi. Neaku, ore tina oitoi netum sii intoyie enkishiunoto amu ore pee etum osiligi naa keishiu sii too nkulie katitin.

Neaku, idolita ajo keeta osiligi tipat oleng. Ore pee metii osiligi keidim oltung’ani atara kewon metua. Kake ore pee etii osiligi naa keidim oltung’ani

ataasa imbaa kumok enking'asia. Naa keidimayu pee etum sii enkishiunoto to sesen tenkaraki osiligi sidai.

Ore tiatua kanisa o tenkishui ang eisidai oleng osiligi. **Kenare nikimpanka imbaa e kanisa to siligi lo Laitoriani.** Amu, kiyiolo aajo keretu iyiook neisho iyiook engolon pee kipuo dukuya. Ore pee metii osiligi lo Laitoriani atua kanisa aashu iltauja lang anaa ilairukok, naa keidimayu pee kishalu oleng nikisina-nuo. Neitashe esiai Enkai tiatua kanisa o tiatua enkishui ang.

Ore enyorrata naa keitisiny enkirukoto o nkipankat ang. Amu, ore pee kipuo dukuya metii enyorrata meeta tipat inkipankat ang. Kake ore pee kimpanka imbaa nikitum induaat tenkirukoto, to siligi, o te nyorrata naa keaku enkoittoi sidai too nkonyek Enkai. Kiyiolo pooki kulo kererin ootii embuku oo Lkorintio le dukuya 13: 1-3. Kejo olkereri li are, *“Kaidim ataa kaata enkishooroto e naibon o eyiolounoto oo nkisudorot misili pooki o eng'eno pooki, kaidim ataa kaata enkirukoto nadotu ildoinyio, kake tenemaata enyorrata mara toki.”*

Neaku, ore pee kipuo dukuya kenare nikias imbaa pooki tenkoittoi enyorrata. Etejo Paulo to Lkorintio li are 5:14, *“Amu, enyorrata e Kristo naitore iyiook...”* Ore likae rorei oiririkino naa tinikijo enyorrata e Kristo nareuta iyiook. Kipuo dukuya tenkaraki enyorrata e Kristo. Kenyor iyiook oleng nebukoki sii iyiook enyorrata enye pee kinyor sii ilkulikai (Iroma

5: 5). Nejo 1 Yohana 4: 20, “Tenejo likae, ‘Kanyor nanu Enkai,’ neiba olalashе lenye, kelejisho amu ore olemenyor olalashе lenye otoduaa, nemeidim ninye atonyorra Enkai neitu ae kata edol.”

### ***Enchalan ang o engolon Enkai - 2 Ilkorintio 12: 8-10 ; 13: 4; 1 Ilkor. 1: 27-29; Ifilipi 4: 13***

Keeta Paulo emuoiyian naje neomon Enkai pee eishiunye ninye kake etiaaka Enkai ninye, “Ekibaiki iyie empiris ai, amu te wueji neshal eitabari engolon ai katukul.” Nelo Paulo dukuya ajo, “Neaku kang’idakino oleng awuasare enchalan ai, pee eparnat engolon e Kristo atua nanu. Enkaraki ina pee ang’amu menatisho te ng’ida, o enkinyala o ngolikinot, sinaitin o nyamalaritin, te nkaraki Kristo; amu ore enkata nashal nanu ina kata agol.”

Neaku, ore pee ening Paulo enchalan neomon Enkai nejing engolon Enkai atua oltau lenye. Neaku, keeta Enkai inkoitoi kumok pee eiteng’en iyiook pee kingarakino ninye alang engolon ang.

Ore sii tinikipuo dukuya aipanka imbaa e kanisa niking’oru induaat naa ebaiki ore inkulie katitin nikining enchalan oleng kake ore pee kintarasaki Enkai ina shalan nikiomon ninye naa keibelekeny ina shalan aitaa engolon. Neaku, maape dukuya ata tenaa ekining enchalan amu keretu Enkai iyiook. Kenyor ninye teneasisho tiatua enchalan ang.

Ore pee kidol enkishui e Yesu naa ekidol aajo etusuja ninye enkoitoi enchalan oleng pee eye ninye te shumata osalaba kake eibeleyenya Enkai ina shalan tenkoitoi enking'asia aita engolon (2 Ilkor. 13: 4). Neaku, ata tenaa lasima pee kisuj enkoitoi naitashal iyiook oleng eton eidimayu pee easishore Enkai ina oitoi pee eitodolu engolon enye o enkitoo enye. Amu, ore pee king'iri nikisilig Enkai naa keibeleyenya imbaa te nkoitoi enking'asia.

Nejo Paulo te 1 Ilkor. 1: 27-29, “... *kake etegelua Enkai nena naamoda te nkop pee eitukurru nena naagol, etegelua lelo oojo enkop emodai pee eitukurru lelo oogol. Etegelua Enkai lelo lemejo enkop eeta tipat nemenari sii, o lelo lemeetae apa pee etum aita pesho nena naatae, pee metumi oltung'ani hoo owuasa te dukuya Enkai.*” Neaku, matadamu aajo ata tenaa kemenu iyiook iltung'ana le nkop tenkaraki kejo ninche kisujita enkoitoi enchalan, meeta enatiu amu kiyiolo aajo kisujita enkoitoi Enkai. Ore sii enkoitoi nemeeta tipat too nkonyek oo lkulikae naa keidimayu pee eeta tipat oleng too nkonyek Enkai. Neaku, menare nikiure enajo ilkulikae tung'ana lemeeta eyieunoto pee esuj enkoitoi e Yesu. Amu, keidimayu pee eaku enkoitoi nameni oleng tena kop enkoitoi sidai enking'asia. Naa keidimayu pee eretu ina oitoi kanisa oleng. Neaku, mincho shetani erishata tiatua oltau lino kimitiki itum indamunot sidain. Amu, ore pee itum endamunoto nabo sidai

nikiliki shetani ajoki meeta tipat ina damunoto nikipik ninye enkuretisho tiatua oltau lino pee milimu endamunoto ino katukul.

### *Ilfilipi 4: 13*

Kejo ilo kereri, “*Aidim ataasa mbaa pooki tiatua ilo laa ninye laaidimie.*” Kesipa inchere ketii imbaa kumok nimikiindim aataas kake kajo ketii esipata nagut naipirta ilo kereri aa inchere ore pee eyieu Enkai nikias entoki naje nikiata sii emborron niking’-amunye engolon enye, naa kajo ekiindim aataas imbaa kumok nimikiindim aataas tengolon ang maate. Neaku, ore pee etii esiai nagol oleng nikiyieu nikias, nikiata sii osiligi oleng aajo keyieu Enkai nikias ina bae, naa kajo keisho Enkai iyiook enkidimata pee kias tinikiruk ninye aaisilig ninye oleng pee eretu iyiook. Neaku, ore kigira aaipanka imbaa matadamu aajo ketii Enkai tenebo iyiook, naa ore pee eyieu nikias embae nagol oleng naa keidimayu pee kias tenebo engolon enye. Nejo sii Ilmaasai, “*Melam olampu olee,*”<sup>13</sup> aa inchere kegol enyorraa ilewa loo Lmaasai aatejo imeyiolo aashu eishintaki aashu meidim. Nejo sii keidim ilewa aataas imbaa kumok aalang inkituaak. Kiponaa iyiook ilairukok nikijo, “Tenebo engolon Enkai naasisho tiatua iyiook.”

## *Ifilipi 2: 12, 13*

Kejo kulo kererin, “*Ore naa ilanyor laainei, anaa enitoning’ishote oshi ake neijia sii o taata mme ake anaa atii kake eisul oleng matii, entabai enjeunoto inyi te nkuretisho o te nkikirikirata. Amu Enkai naasisho tiatua intae, te pokira are, te yieunoto o te asata inyi te nkaraki murruna enye sidai.*” Kajo kegira Paulo aitanap lelo tung’ana pee ening Enkai anaa enatoning’o Yesu Enkai (Ifilipi 2: 1-11), neas esiai enye egira aasipu aajo ketii Enkai tenebo ninche. Kenare niking sii iyiook Enkai nikiyiolou aajo etii Enkai tenebo iyiook tenkiterunoto negira ninye aretu iyiook pee kiata eyieunoto o pee kias sii. Naa meishiakino sii tinikitoni ake te kanisa nikiasishore enjeunoto ang anaa enkitolonyata pee mikipuo dukuya. Kake ekipuo dukuya te ***nkuretisho o te nkikirikirata*** amu kiyiolo aajo ekishal naa keidimayu pee kibatata tinikisilig engolon ang ake.

Neaku, ore pee kias esiai e kanisa niking’oru induaat sidain, matisipu aajo ketii Enkai tenebo iyiook inkatitin pooki neretu iyiook pee kiata eyieunoto neretu sii iyiook pee kintabaya imbaa.

***Enkai naata ewalata kake keasishore sii iltung'ana.***

Kejo 1 Yohana 3: 20, “... ***amu kitok Enkai alang iltauja lang, neyiolo pooki toki.***” Nejo sii Ilhebrania 4: 13, “*Naa ore te dukuya ninye, meetae hoo toki te nena naaitayioki naisudoro kake keibala pooki neboluni te dukuya nkonyek e ilo likiyaki imbaa ang.*” Kejo Olkerempe le Nkai 44: 21, “... *Amu eyiolo ninye nkisudorot o ltau.*” Neitoki ajo Olk. 51: 6, “*Ng'ura, esipata e atua oltau iyieu iyie; ore enkaraki ina inteng'enaki nanu eng'eno nagut tiatua enkisudoroto o ltau lai.*” Ore tenkaraki kesipa ina bae anaata kiata enkomono naijio ina natii Olkerempe le Nkai 143: 8, “*Nteng'enaki nanu enkoitoi naaim amu iyie nanu ailepakinye oltau lai.*” Matisipu sii Ndung. 16: 2- 4, 9, “*Ore inkoitoi pooki oltung'ani naa sidain too nkonyek enyena, kake Olaitoriani ninye oineneng oltau. Inteleiki esiaai ino Olaitoriani, naa keitash-eyieki inkitobirat inono. Eitobirua Olaitoriani pooki toki te nkipirta enye, neija sii etiu ilarruok teina olong e nyamali.... Eitobir indamunot o ltung'ani enkoitoi enye, kake Olaitoriani ninye outaa iroruat enyena.*”

**Neaku, ore inkatitin pooki tenaa kigira aai-maki imbaa anaata kidamu aajo Enkai ake nayiolo esipata te lulung'ata neyiolo sii ninye enkoitoi nanarikino nikiim.**

Matadamu sii aajo keasishore Enkai iltung'ana pee eimaki imbaa pee etum iwalat anaa te mbuku o lasat 15 pee eosh enkiguena apa aaimaki imbaa e kanisa. Kejo olkereri li opishana, *“Ore etoodoro enkiguana narrish, neinyototo Petero....”* Neaku, etotona oleng aaimaki imbaa kake ketii Enkai tenebo ninche amu etejo ina palai, *“Amu etoduaa Enkiyang'et Sinyati o iyiook; inchere pee mikinteleiki intae likae ola olusoo te kuna baa naata tipat...”* Neaku, idolitata aajo ketii Enkiyang'et Sinyati tenebo ninche kake eimakita nena baa sii enkata naado. Kenare sii tinikiimaki imbaa taata te kanisa nikiata osiligi aajo ketii Enkiyang'et Sinyati tenebo iyiook.

### *Empukunoto e kanisa nayieu Enkai*

Kiimakita embata e kuna baa kake keretu iyiook tinikintutum ninche aimaki ti ai oitoi e kanisa. Neaku, ore enkilikuanata nayieu nikidamu naa inchere kaa pukunoto e kanisa eyieu Enkai? Amu, keeta Enkai enkipankata apake pee easishore kanisa pee ening iltung'ana ororei le Nkai nesipu eng'eno Enkai (Efeso 3: 6, 10). Matadamu kuna baa. Ore enedukuya, keyieu Enkai **KANISA ENKOMONO**. Eitanapa Paulo kanisa Efeso aiko neijia, *“Entoomon inkatitin pooki te Nkiyang'et te nkomono pooki o eomono-kinoto. Ore teina enchololoto te ncheikinoto iomonokiki isinyat pooki o nanu sii...”* (Efeso 6: 18,

19). Neaku, kenare netum kanisa irishat e tipat enkomono. Nepukoo sii aomon (Mat. 6: 16-18). Ore enkomono naa keipirta embae najo inchere mikiata engolon oopeny kake ekishal oleng nikiyieu engolon Olaitoriani anaa enikiyieu enkijape. Ore pee kimpanka imbaa keyieu netii enkomono tenguton oleng. Ore pee kilikioo ororei le Nkai nenare nikijing enkomono. Ore pee etii inyamalaritin oompukunot pooki nenare netii enkomono dukuya pooki toki.

Neyieu sii Enkai **KANISA NAIMARIRI YESU KRISTO** o lomom supati. Neaku ilo olbakunoto sidai anaa enalimu Paulo to Lkorintio le dukuya 3: 11. Keliki sii iyiook Ilhebrania 12: 2 pee kimariri Yesu. Kidamu osalaba o empiunoto enye anaake tenkishui ang o tenkiteng'enare ang (1 Ilkor. 1: 23-25; 15: 1-58; Ilgal. 2: 20).

Keyieu Enkai **KANISA NAATA ENYORRATA**. Etejo Yesu te mbuku e Yohana 13: 35, *“Teina eyiolou pooki aajo, irara looiteng’eni laainei, ti niatata enyorrata olikae o likae.”* Neitanap sii Yesu iyiook pee kinyor Enkai ole latia lang (Mat. 22: 37-40). Neaku kinyor kanisa Enkai nenyor olikae olikae. Nenyor sii ilmang’ati lenye teng’eno (Mat. 5: 38-47). Neretu lelo ooata enyamali tiatua kanisa (1 Ilkor. 12: 28; 1 Tim. 5: 16; Yakobo 5: 13-16). Nererioo sii iltung’ana temberron o teng’iriata (2 Tim. 2: 24-26; 4: 2; Yakobo 3: 13-18; ) Nenyok pee etii ilng’anayio le nyorrata (1 Ilkor. 13: 1-13; Ilgal. 5: 1, 2, 9; 13-15, 25;

Efeso 4: 15; Ilfilipi 1: 9-11; 2: 1-11). Neitoomon ilairukok ng'ejuko tenkiyang'et enyorrata. Ore pee epuku enchankar naje neimaki imbaa pooki tenkanyit, temborryon, o tenyorrata nagut.

Keyieu Enkai kanisa **NAITENG'ENISHO BIBILIA TENKOITOI ESIPATA (2 Tim. 3: 16; Tito 2: 1-8; Mat. 28: 18-20)**. Neaku, keeta enkipankata pee eiteng'en iltung'ana leitu eiruk, iltung'ana ooyieu neibatisa, ilairukok ng'ejuko, iltung'ana ooyieu neaku ilarikok le kanisa, inkituaak, ilbarnot o inkera pooki tenkoitoi nairirikino embulunoto enye. Keiteng'enisho Bibilia te nkoitoi enkipirta nairirikino iyieunot e kanisa. Neiteng'en iltung'ana pooki metaasishore inkishoorot te retoto e kanisa. Neeta sii enkipankata enjurrunoto oo siaaitin e kanisa. Metaa mepuo dukuya aasuj enkipankata nemeloito dukuya aitobiraki. Nelo dukuya tenkiteng'enare e nkumparu too lairukok pooki ooyieu neiteng'eni pee eidim aaisoma Bibilia. Keiteng'en sii ilarikok le kanisa ororei aitobiraki anaa enalimu 1 Tim. 4: 16; 2 Tim. 2: 15.

Neaku, ore tenkaraki ina kenare nikinteng'en ilairukok pee eaku ilaiteng'enak (ilasujak) le Yesu aa inchere ilairukok ootubulutua tiatua Yesu neasita sii ninche esiai e kanisa anaa enairirikino inkishoorot enye (anaa ilmempai le kanisa). Nikiasishore ilturrurri sapukin o lturrurri kutiti nikiasishore sii enkiteng'enare ooltung'ana moo obo. Nikinteng'en sii iltung'

ana ometa eyieunoto pee eaku ilarikok le Kanisa. Nikinteng'en sii inkera anaa enairirikino ilarin lenye. (Mat. 28: 20; Iroma 16: 5; 11 Tim. 2: 2; Efeso 4: 11-13; Ilkol. 1: 28, 29; Iasat 2: 42-47; Enkig. 4: 9; 11:19).

Keyieu Enkai **KANISA NAITENG'ENISHO ENKOITOI ENJEUNOTO AITOBIRAKI**. Metaa keiteng'en iltung'ana pee eiruk Yesu anaa Olaitajeunoni, Olaitoriani neiruk sii ajo ore Yesu naa oltung'ani ometa empukunoto Enkai kewon tenguton. Neirridu sii iltung'ana aibelekenya katukul aing'uaa inkoittoi oong'ok. Neibalunyie enkarna e Yesu ajo Olaitoriani ninye. Neibatisai pee etum empalakinoto oo ng'ok, tenebo Enkiyang'et Sinyati tenkaraki empiris Olaitoriani o enyorrata enye tialo ilaing'okok. Nelo dukuya te nkoittoi e sinyatisho (Yhn. 5: 24; Iasat 2: 38; Col. 2: 6, 7; Iroma 10: 9, 10; Ilgal. 3: 27; 2 Pet. 1: 5-10; Marko 16: 16).

Keyieu sii Enkai kanisa naata **ENKIPANKATA SAPUK O NDUAAAT SAPUKIN NAAIPIRTA ELIKIOROTO OROREI LE NKAI**. Nelikioo ororei le Nkai te nkop enye nedamu sii ilkulikae oshon pee ening ninche ororei le Nkai. Nelikioo ilomon supati le Yesu aayietu iltung'ana enetii Yesu neiteru sii inkanisani. Neaku, ore tenkaraki ina kenare nenyorraa ilairukok pee epuo aaliki ilkulikae ilomon supati oipirta Yesu o enkeeya enye tenkaraki iyiook, neitoki aaliki ninche eneiko pee eng'amu Yesu te nkirukoto, o tenkirridunoto o tenkibatisa pee eaku

ninche ilairukok le Yesu. Neitoki ilairukok aaiturrurr iltung'ana te kanisa. Tenemetii kanisa ewueji neje, neiteru kanisa ng'ejuk (Matayo 28: 18-20; Marko 16: 15, 16; Iasat 1: 8; 2: 38; 8: 12; 15: 9; 18: 8; Iroma 5: 1; 6: 1-4; Efeso 3: 10, 20, 21; Ing'orai inki-tanyaanyukot e Paulo pee eun inkanisani kumok – Iasat ematua e 13-28).

Keyieu sii Enkai **KANISA NAISHIAKINO OLKUAK OJE**. Metaa keishiakino isinkolioitin ooranyi teina kanisa olkuak sidai oipirakinore ororei le Nkai te lelo tung'ana anaa teilo osho neme ilkuaki le kulikai oreren. Neaku, mme lasima pee esuj olkuak loo Lashumpa aashu ilkulikae kuaki ake lemejing'a ewueji netii kanisa. Kake ore toonkulie baa naagilunore ororei le Nkai naa aisidai tenepaashare kanisa ilo kuak (1 Yohana 2: 15-17).

Neyieu sii Enkai kanisa **NAISHO** metaa kegira iltung'ana aabulu negira aaiu ilng'anayio, negira sii aun inkulie kanisani (Tisipu kulo kererin – Luka 3: 9; Yhn. 15: 1-17; Iroma 7: 4; Igalatia 5: 22-26; Ifilipi 1: 11; Ilkolosai 1: 9-14; Yakobo 3: 17, 18; Matayo 28: 16-20). Neaku, kegira iltung'ana aalikioo ororei le Nkai aiteru tiatua ilmareita lenye nepuo dukuya aaliki sii ilkulikai te murua aashu elatia enye o toonkulie wuejitin anaa enatejo Enkai te Matayo 28: 19, 20, Iasat 1: 8, Marko 16: 15, 16. Ore anaa enajo sii lelo kererin kegira aaibatisa iltung'ana negira sii aiteng'en ninche.

Neyieu Enkai **KANISA NAITAYU KEWON**. Metaa ore iltung'ana ootii kanisa neata eyieunoto pee eitayu ate pee eas esiai Olaitoriani (1 Pet. 5: 2; Tito 2: 11-14; Marko 8: 34; Iasat 20: 24; Iroma 16: 6, 12; 3: 23-25; 1 Ilkor. 3: 9; Ilfilipi 2: 25-29; Ilkol. 1: 28, 29; 4: 12; 2 Ilkor. 5: 14; 8: 1-9). Neas sii tenchipai o tenkarna e Yesu (Ilkol. 3: 17). Neishooyo nkishoorot tenchipai (2 Ilkor. 9: 7). Neeta enkipankata nawang naipirta eramatare oo masaa e kanisa e Nkai (1 Ilkor. 12: 28; 2 Ilkor. 8: 16-21). Neaku, keeta eyieunoto pee eas esiai e kanisa ata eton eitu eikilikuan ninche olarikoni pee eas esiai naje (2 Ilkor. 8: 4, 5). Keikilikuan ilairukok ilarikok isiaaitin naayieuni neasi. Neas tenchipai.

Keyieu sii Enkai kanisa naata **ENKIPANKATA TENEBO INDUAAT** naipirta erishata nalotu. Keata enkipankata o nduaat naipirta elikioroto, erripore e kanisa, enkiteng'enare nairirikino iltung'ana pooki, enkisisa e kanisa tenebo enchula, endaa Olaitoriani, eretoto ooltung'ana lemeidim ate o ltung'ana oogira ilkulikai aaitorogony ninche. Neeta sii inkipankat tenebo induaat naaipirta enkiwanja e kanisa naret esiai e kanisa (Iasat 20: 27-31; Efeso 4: 11-13).

Keyieu Enkai kanisa naata enkipankata sidai **PEE EASISHORE ILTUNG'ANA POOKI INKISHOOROT ENYE** te kanisa. Nejo 1 Petero 4: 10, *“Taasishore inkishoorot naaba anaa inikinchooki*

*aisiaayie ilkulikae, anaa olaing'urani supat te mpiris e Enkai oo mpukunot kumok.*" Neaku, keyieu netii iltung'ana ooitashiki ina siai pee eretu iltung'ana pooki metaasishore inkishoorot enye.

Keyieu Enkai **NEETA KANISA ILARIKOK OOTUBULUTUA** neyiolo esiai enye te kanisa neeta eyieunoto pee eas esiai enye, neeta sii induaat naaipirta embulunoto e kanisa (Tito 1: 5-9; Iasat 20: 28-31).

Neyieu Enkai neeta kanisa iltung'ana **OOIBATISAKI NEIRRIDUTUA SII TE NGUTON NEING'OR YESU** anaake te nkishui enye o too Imareita lenye. Neing'oru pee etiu anaa Yesu to rorei, to lkuak, o too nkiaasin. Neitoduaaya ilng'anayio le Nkiyang'et. Neiturukie imbaa Enkai alang imbaa enye maate (Luka 13: 1-9; Ilkol. 3: 1-17; Iroma 8: 5-17; Iasat 17: 30; 19: 19; 26: 20; 2 Pet. 3: 9; Iasat 2: 38-42; Ilgal. 3: 27).

Keyieu Enkai **KANISA OO NKIAASIN**. Etejo Yakobo 1: 22-25 inchiere, *"Kake entaa ilaasak lo rorei, mme laning'ok ake ilejileje ate. Amu te neaku ake oltung'ani olaning'oni lo rorei, mme olaasani, netiu ninye anaa oltung'ani oing'or enkomom enye te nking'uret. Amu eing'or ninye enkomom enye, ore pee elo, nerikino nabo kata enaikununo. Kake ore olojur asipu inkitanapat bayarot, inkitanapat e lakunoto, nesheikino, nemetiu anaa elde ake oning nerikino, kake olaasani ooata nkiaasin, ore ilo*

*nemaiyiani tiatua iyasat enyena.*” Neaku, kenare neeta sii kanisa enchula sidai. Neeta enchula too Njumapilini pooki neisom Bibilia sii tempolos e wiki. Neeta sii irishat pee eeta enchula sapuk tenebo. Neata naboisho. Neirridu neata emborron. Neitashe aagilunore ilkuaki torrok te murua enye. Keisiai neikok olikai olikai te mborron o te nyorrata. Nelikioo ororei le Nkai.

Keyieu Enkai kanisa **NAATA SHORUETISHO** tenebo ilkulikai. Tenkitanyaanyukoto, keidimayu pee eeta kanisa shoruetisho tenebo olmusheni pee eas esiai naje. Keeta Paulo shoruetisho oleng tenebo kanisa oo Filipi (Ilfilipi 1: 4).

Neyieu sii Enkai **KANISA NAATA EMBIOTISHO**. Ore tenchoto oo ropiyiani keeta ilairukok pooki eyieunoto pee eitayu iropiyiani aashu imasaa enye pee eretu kanisa (2 Ilkor. 8: 1-15; Iasat 2: 42-47; 5: 32-37). Nemeiken tenaa entoki sapuk aashu entoki kiti (Luka 21: 1-4). Kake keishoru anaa enaidim o anaa enaning oltoilo le Nkai tiatua oltau lenye (2 Ilkor. 9: 7). Neisilig Yesu tengolon Enkiyang’et o te nyuaata. Neeta ilarikok oorikoo kanisa te ng’eno o te nyuaata. Negira aalikioo ororei le Nkai negira sii aun inkulie kanisani. Netii enkoitoi sidai pee eitobir inyamalaritin e kanisa. Nedamu ilairukok pooki kanisa anaa olmarei metaa keramat neeta enkipankata sidai netii enyorrata sapuk.

Matadamu tenguton **KANISA ANAA OLMA-REI**. King'as aadamu kuna baa. Ore Enkai naa papa lang, Neaku kira olmarei tiabori Erikore Enkai – Iroma 1: 7; 8: 15; 1 Ilkor. 1: 3; 2 Ilkor. 1: 2; Ilgal. 1: 3-5; 1 Petero 1: 17. Kira inkera Enkai – Ilgal. 3: 26, 27; 4: 1-7; Iroma 8: 12-17; Efeso 5: 1; Ilfilipi 2: 14, 15. Ore kanisa naa enkang e Nkai – 1 Tim. 3: 14, 15. Neaku, ore tenkaraki nera kanisa enkang aashu olmarei naa kenare nikiramat iltung'ana anaa olmarei anaa enajo Paulo te 1 Tim. 5: 1, 2.

Keeta kanisa kuna pukunot naijo inolmarei? **Enyorrata** – 1 Ilkor. 13: 7; Efeso 5: 25-33; **Enkanyit** – 1 Pet. 2: 17; Efeso 5: 21-33; **Olng'ur** – Ilkol. 3: 12; **Ening'unoto** - Yakobo 1: 19-21; **Esipata** - Efeso 4: 15, 16, 25; **Eng'iriata** – Ilgal. 5: 22, 23; **Enkikoo** (Efeso 6: 4); **Empalakinoto** – Ilkol. 3: 13, 14; **Enkibalunoto** – Yakobo 5: 16; **Eramatare oo siaitin olmarei – neeta oltung'ani pooki esiai enye** – 1 Pet. 4: 10; **Enkomono-** Ilkol. 4: 2; 2 Ilkor. 1: 11; **Enkisumata Oreori le Nkai tenebo** – Mat. 5: 6; Ilheb. 4: 12, 13; **Emborron – enkitadounoto e kewon** – 1 Petero 5: 6, 7; Ilkol. 3: 19; **Erripore** – 1 Tim. 4: 16; Iasat 20: 28, 29; **Eramatare oo ropiyiani oo ntokitin** - 1 Timoteo 6: 17,18; **Eramatare oo seseni o enoo ltauja** – 2 Ilkor. 7: 1; 1 Iles. 5: 23, 24; **Eretoto – pee kiretuno** – 1 Iles. 5: 14; Iasat 20: 35; Iroma 16: 2; 1 Ilkor. 12: 28; 1 Tim. 5: 16; Ilheb. 6: 10; **Erikore sidai** – 1 Tim. 3: 1-13; **Enduaata sidai**

**aashu enkipankata naipirta inkolong’i naaponu** – 1 Tim. 3: 5; Ndung. 10: 4; 23: 18; Ilgal. 6: 7-10; **Olaikooni** 10: 18; Mat. 25: 14-25; **Enchipai tenebo enkguran o enkuenia** – Iroma 14: 17; Iroma 15: 13; Ilfilipi 1: 25, 26; 1 Pet. 1: 8, 9; **Enyuaata** - 2 Pet. 1: 5-9; 3: 14; Iroma 14: 19; Efeso 4: 3; 2 Cor. 5: 11; 1 Illes. 5: 15; **Enashe** - Ilfilipi 4: 6, 7; Ilkol. 2: 6, 7; **Ererioroto** – Efeso 6: 4; **Enkirototo sidai** – Efeso 4: 29; 5: 4; **Enkitagoloto olikai olikai** – Ilheb. 3: 12, 13; 10: 24, 25; **Elikioroto Ororei le Nkai** – Matayo 28: 19, 20.

Ore te sipata ore kanisa naa etiu anaa olmarei. Kake ore ebaiki ena rishata taata nikitii neton medamu enkumoi ang kanisa anaa olmarei. Neaku, eton kintadou kanisa metaa mikiramat kanisa nimikinturukie imbaa e kanisa.

Neaku, matisipu kuna baa pooki pee kisipu aajo kaa kias pee kirridu nikimbung kanisa anaa olmarei lang tiatua Yesu. Naa kaata osiligi ajo ore pee kias ina naa kebulu kanisa oleng amu keata pooki ng’ai enyuaata tialo kanisa.

Neaku, metaretu Enkai iyiook pee kirridu taata nikipal inkitolonyat nikipuo dukuya aaing’or kanisa anaa olmarei. Nenyok pooki airukoni te kanisa aas esiai e kanisa neibung sii nena pukunot e kanisa naaijo ino Imarei.

Maing’urai kuna baa tiatua embuku e dukuya e Timoteo pee kidol aajo kaa oitoi naishiakino pee

kiramat kanisa anaa olmarei aashu enkaji Enkai. Kenare netii enkiteng'enare nasipa – 1 Tim. 1: 3-7. Nenare netii olnɡ'ur o empalakinoto oong'ok – 1 Tim. 1: 12-17. Nenare netii enkomono tiatua enkang Enkai (1 Tim. 2: 1, 8). Nenare neeta inkituaak emborron – 1 Tim. 2: 9-14. Nenare neeta olmarei le kanisa ilarikok sidain – 1 Tim. 3: 1-7. Nenare neisiligayu inkituak oolarikok – 1 Tim. 3: 11. Neeta enkaji Enkai Olairritani oramat kanisa aitobiraki neibooyo inkiteng'emat nemesipa – 1 Tim. 4: 1- 16. Keramati pooki ng'ai te kanisa anaa enaramati tolmarei – 1 Tim. 5: 1-20. Neasishoreki iropiyani tenkoitoi sidai (1 Tim. 6: 3-10; 17-19).

Maing'orai sii 1 Petero 4: 7-11. Kenare netii enyorrata tiatua iyiook – 4: 8. Nenare netii enkitoomono – 4: 9. Nenare nikiaasishore inkishoorot ang naaisho Enkai iyiook – 4: 10-11.

Keyieu Enkai **KANISA NAATA OLNɡ'UR** nanyor iltung'ana pooki (ilairukok o ileitu eiruk) neshilaa inkolati enye – Neaku, ore tenkaraki ina anaata enyok oleng ilairukok aaretu iltung'ana oota inyamalaritin anaa enairirikino enkidimata enye pee eitodolu enyorrata e Kristo. Neretu sii ninche pee eretu ate (Iasat 2: 45; 4; 32-37; 6: 1-6; Mk. 1: 32-34; 40-42; 12: 31; Yko. 1: 26, 27; 2: 14-17; Ilheb. 13: 1, 15, 16; 1 Yhn. 3: 16-20). Kejo Ilmaasai inchere, "*Turia inobulu,*"<sup>14</sup> aa inchere ore pee ebulu kenya ina kerai naa eikinkilikuan imbaa torrok apa nintaasa

ninye eton aa kiti. Neaku, ore pee miramat ilooshal nitum sii iyie enyamali.

**NEYIEU ENKAI KANISA NAATA NABOISHO.** Metaa ketoni iltung'ana to sotua. Neitobir sii enchankar. Nenyor sii ilairukok ilalashera o nkana-shara oleng metaa meisur olikai olikai kake teneshalu obo neretu olikai. Netii sii naboisho tenebo inkulie kanisani (Efeso 4: 1-6; Ilkor. 1: 10-17; Mat. 18: 15-20; Ilgal. 6: 1-5).

Neyieu sii Enkai **KANISA NAISIS NINYE TE NKIYANG'ET O TE SIPATA NEETA SII ENKIPANKATA SIDAI TE SEREMARE TE JUMAPILI** (Yhn 4: 23, 24). Neaku, ore tenkaraki ina kenare netumo ilairukok aasis Enkai tenebo te nkaji e kanisa, toonkajjik, o toonkatitin pooki enkishui enye. Ore sii te pooki toki nikias, nikias tenkisisa Enkai o Yesu. Nikinturukie sii imbaa Enkai alang inkulie baa enkop (Mk. 12: 28-31; Ilheb. 10: 24, 25; 12: 28, 29; Ilkol. 3: 15-17; Iroma 12: 1, 2; 1 Ilkor. 14: 40).

Keyieu Enkai kanisa **NADAMU YESU TE MESA OLAITORIANI** (Luka 22: 19). Amu, ore osalaba naa keeta tipat oleng. Nikitum iyiook enkordunoto o njeunoto tenkaraki enkeeya e Yesu (Rom. 3: 22-26; 4: 25; 1 Petero 1: 18-21).

Meimaki Bibilia ena bae aiuloki kake **ORE PEE EETA KANISA ENKAJI TENEBE ENKIWANJA ENYE KAATA OSILIGI AJO KEYIEU ENKAI**

**NIKIRAMAT SII NINCHE.** Kake kesipa keimaki Bibilia ena bae inchere pee kiasishore aaitobiraki intokitin nikiata (Mat. 24: 45-51; 25: 14-30).

## EMATUA E UNI

*Inkulie baa naanare nikidamu o nkoitoi  
nikiaasishore pee kitum induaat sidain naaret  
kanisa*

*Kenarikino pee eata pooki anisa enduaata  
naipirta nena tipati nikiimakita e kanisa o nena  
yieunot Enkai amu Enkai nayieu nikiata kanisa sidai  
naata inkipankat o nduaat.*

Ore kigira aipanka pooki toki nenare **nikidamu nena tipati pooki e kanisa o nena baa naaipirta enayieu Enkai**. Amu, kelelek pee kireiki nabo ake nerikino iyiook inkulie. Neaku, keyieu nikiata enkoitoi te kanisa naata enkiririkinoto toonaipirta intipati pooki e kanisa o mbaa pooki naayieu Enkai. Neaku, matonyok pee kirerioo inkanisani ang toonaipirta nena baa pooki. Amu, ebaiki nimikiasita nabo e nena. Aashu ebaiki ekiasita kake ekishal te nabo aashu ti are.

**Matadamu tipat e kanisa ang o enayieu Enkai inkatitin pooki kigira aipanka imbaa**. Matadamu enikias pee kintadamu ate. Eisidai sii tenedamu pooki tung'ani nena baa **pee eaku inenkorrok enye**. Metaa ebaiki nejo oltung'ani: Keyieu Enkai nalikioo ilomon supati, neyieu naliki olmarei lai o ilchoreta laainei. Aashu keyieu Enkai naaku olasujani le Yesu

otubulua. Aashu, keyieu Enkai naasishore inkishoorot aainei pee aretu kanisa. Aashu, keyieu Enkai nanyor ilkulikae naret ninche anaa enaidim tengolon Olaitoriani.

Matadamu sii aajo keeta tipat oleng **ilturrurri kutiti** pee eretu iyiook pee kibulu tiatua Yesu.

Kenare sii nikidamu aajo **kainyio naibokito kanisa** ang pee mebulu. Ore pee kisipu ina nikinyok oleng pee kirerioo ina nyamali. Aashu kiindim aaikilikuana ate aajo ainyioo pee meponu iltung'ana kanisa ang? Nikirerioo sii nena baa.

Kenare **nejing** kila **olairukoni** ng'ejuk (ilooibatisaki det) kilasi (**enkisoma**) pee eyiolou tipat e kanisa nesipu sii ajo kaji eiko pee easisho te kanisa. Nesipu enkiteng'enare e kanisa. Neyiolou sii ajo kainyio enduaata e kanisa. Neyiolou aajo kainyio nanare neas teneaku olmempai le kanisa. Keyiolou sii tipat olturrur kiti negelu sii nabo pee ejing.

Kenare neipanka ilarikok induaat e kanisa naaibung'akino intipati e kanisa o nena baa naayieu Enkai pee etum kanisa enkoitoi sidai pee elo dukuya aitobiraki.

Kaisho intae enkitanyaanyukoto pee eibalayu ina bae. Ebaiki netoni ilarikok le kanisa aaimaki nena baa pooki netum induaat naijo kuna. Ore pee egelu induaat naaje nesir anaa kuna:

(1) Kiata enduaata e kanisa pee etii **iltung'ana oonyor Enkai** tooltauja lenye pooki. Nedamu enkishui enye pooki tenkoitoi enkisisa Enkai. Netisiputua aajo ore intokitin pooki naa ine Nkai neaku kenyor Enkai neisho inkishoorot.

(2) Kiata enduaata e **kanisa nalikioo ilomon supati** anaake. Negira aomonoki ileitu eiruk anaake. Negira sii aasishore inkishoorot toltauja sidain owang pee ening ilkulikae ororei le Nkai. Negira aaliki ilmareita lenye o lchoreta lenye ororei le Nkai. Negira aun inkulie kanisani.

(3) Kiata enduaata e **kanisa naiteng'en ilairukok** pee eaku ilasujak oodupa oleng le Yesu. Nebulu sii metaa iltung'ana ootubulutua tiatua Yesu pee eas esiai nairirikino ninche te kanisa.<sup>15</sup>

(4) Kiata enduaata e **kanisa enyorrata** metaa kening iltung'ana enyorrata enye, neata kulo tung'ana pooki eyieunoto pee eponu: ilaisinak, ilooshal, o laing'okok pee etum osiligi o enkiyeng'iyeng'ata. Neshilaa sii kanisa inyamalaritin e murua te nyorrata.

(5) Kiata enduaata e **kanisa naisis Enkai** tenkoitoi naitiship Olaitoriani.

Keyieu netum ilarikok le kanisa **aaipanka** aajo kaa eas te kuna olong'i pee ererioo kanisa nenyok o metabana neasayu ina pee esidano kanisa. Aashu matejo pee easayu induaat ang naaipirta kanisa. Keidimayu pee eata enkipankata olari oje aashu ilapaitin ile ake. Ebaiki neata sii enkipankata sapukoolarin kumok ooponu aajo kainyio induaat enye pee eas nyoo aashu pee eaku kanisa empukunoto naata impukunot naikununo aja.

Neaku ore esiai oo larikok naa pee etumo tenebo pee eimaki nena baa netum enkipankata sidai. Neimaki sii inyamalaritin naaibokito kanisa pee mebulu aitobiraki. Amu, tenkitanyaanyukoto ore pee mebulu enkerai ino naa isipu oleng pee iyiolou ajo ainyioo pee megira abulu o metabana nitum ewalata sidai. Neaku, mataas sii ina te kanisa amu ore pee megira abulu, naa kemuei. Ore pee esipu ilarikok nena baa nepuo dukuya aarare aaing'oru iwalat e nena kipankat o nena nyamalaritin pee elo kanisa dukuya. Negelu sii iltung'ana ooitashiki nena siaitin pee easayu. Neaku, keitutum ilkulikae neitadamu sii ninche pee epuo nena kipankat dukuya.

*Manyaaki aadamu kuna yieunot Enkai o  
ntipati e kanisa tenebo te wueji nebo pee  
eibalayu oleng.*

*Keyieu Enkai:*

1. Niking'or Yesu nikimbung nikilikioo ilomon supati.
2. Nikintaa iltung'ana ilasujak le Yesu. Metaa kesuj inkitanapat enyena o iasat enyena.
3. Nikiata enyorrata naata enkitieunoto.
4. Nikiata kanisa naishiakino olkuak oje kake kepaashare ilkuaki pooki oogilunore ororei le Nkai.
5. Neirridu iltung'ana.
6. Nikimbatisa iltung'ana te mpalakinoto oong'ok.
7. Nikinteng'en iltung'ana tenguton (discipleship)
8. Nikinteng'en enkoitoi enjeunoto aitobiraki.
9. Neibalunyie iltung'ana ng'ok.
10. Nikibulu te nkirukoto.
11. Nikiasishore intokitin pooki aitobiraki metaa kisujita enkoitoi eramatare nasinya.
12. Nikidamu iltung'ana lemeidim ate.
13. Nikisis ninye te nkishui ang pooki.
14. Netii kanisa pee eibalayu enkitoo enye te nkop pooki.
15. Netii erikore sidai tiatua kanisa.

16. Nikiata elakunoto tiatua Yesu.
17. Nesuji esipata tenkop pooki.
18. Neyiolou pooki ng'ai ninye.
19. Nikiata osiligi.
20. Nikiata enkirukoto nagut naata enkitieunoto.
21. Nikincho ninye enchalan ang pee eibeleyen in shalan aita engolon.
22. Nikisilig eng'eno enye.
23. Kanisa naitayu ate (sacrificial church)
24. Kanisa naata induaat o nkipankat.
25. Kanisa naata iltung'ana oasishore inkishoorot enye pee eretu kanisa.
26. Kanisa naiteng'en iltung'ana aitorioki imbaa naasipa naaing'uaa ororei le Nkai.
27. Kanisa naata ilarikok ootubulutua.
28. Kanisa naata iltung'ana ooirridu anaake tesipata o te nguton.
29. Kanisa naata enkipankata sidai enkomono.
30. Kanisa naata induaat sapukin naaipirta elikioroto ororei le Nkai.
31. Kanisa nasuj inkiasin e Yesu.
32. Kanisa naata shoruetisho tenebo inkulie kanisani olmusheni sii.
33. Kanisa naata embiotisho.
34. Kanisa natiu anaa olmarei.
35. Kanisa naata emborron.
36. Kanisa naisis ninye tenkiyang'et o te sipata.  
Neata enkipankata sidai te seremare te Jumapili.

37. Kanisa nadamu osalaba le Yesu te mesa Olaitoriani.
38. Kanisa nashilaa inyamalaritin e murua neretu iltung'ana anaa enkidimata naata.

### *Enkipankata e kanisa*

Ore pee kimpanka imbaa e kanisa tiatua kuna orot nenare nikidamu nena baa pooki nikitejo aa inchere kaa pukunoto e kanisa eyieu Enkai. Matadamu kuna orot pee kimpanka imbaa e kanisa:

1. **Elikioroto** ororei le Nkai tenebo eunoto oo nkanisani
2. **Embulunoto** tenebo **Enkiteng'enare** e Kanisa
3. **Eretoto** ooltung'ana lemeidim ate aashu iltung'ana ooata enyamali.
4. **Erikore** e Kanisa
5. **Enkisisa** aashu eseremare e Kanisa
6. **Sinyatisho** ooltung'ana ootii kanisa
7. **Eramatare** Enkaji tenebo enkiwanja e Kanisa.
8. **Naboisho** te kanisa o tenebo inkulie anisani te murua.
9. **Inyamalaritin** naanare nikirerioo.
10. **Inkiasin e Kanisa** tenebo iltung'ana ooas nena kiasin anaa enairirikino inkishoorot enye. Kejo Ilmaasai inchere, "*Meidim olenkaina enking'arra,*"<sup>16</sup> aa inchere meidim oltung'ani obo ataasa isiaaitin

pooki. Neaku, kenare nikiasisho pooki tenebo te kanisa.

Keidimayu pee kipik nena baa pooki tiatua kulo kererin pee eaku enkipirta e kanisa. Metaa keaku elimunoto enkipirta ang, inchere kainyioo esiai ang tena kop anaa kanisa?

**Ekiindim aatejo inchere:**

(1) Kitii enkop oo Lmaasai anaa kanisa pee kilikioo, nikisiai, nikintubulaa nikinchenoki ororei le Nkai (Ilomon supati le Yesu). Nikiun inkanisani naapuo dukuya aaun inkulie anisani.

(2) Nikiretu sii iltung'ana lemeidim ate pee eibalayu enyorrata Enkai tiatua iyiook.

(3) Nikinteng'en iltung'ana pooki te kanisa anaa enairirikino embulunoto enye.

(4) Nikintayu inkishoorot te leng'on aaisho kanisa pee epuo dukuya inkipankat pooki e kanisa.

(5) Nikintayu ate aas isiaitin e kanisa te nyuaata, te nyorrata, te ng'iriata o tengolon Olaitoriani anaa enairirikino inkishoorot ang.

(6) Nikinyok sii pee kiata naboisho, o enyorrata tenebo inkulie anisani. Kake kirrip sii inkanisani ang pee kisuj ororei le Nkai alang ilkuaki loo nkanisani oogilunore ororei le Nkai.

(7) Nikinyok oleng pee kisuj enkoitoi e sinyatisho tiatua enkishui ang.

- (8) Nikinyok pee kigelu nikinteng'en ilarikok le kanisa.
- (9) Nikinyok sii pee kiata eseremare sidai naitiship Enkai.
- (10) Nikiyieu nikiramat enkaji e kanisa o enkiwanja enye (aashu olale).
- (11) Kiyieu nikirerioo inyamalaritin.

Ore inkulie katitin keidimayu pee kinger kuna baa tendorropo. Metaa keaku enkipirta e kanisa inyi te wueji nitii. Kake aigero imbaa kumok tene pee igelu imbaa naaipirare kanisa ino metaa enkipirta eina anisa nitii. Keji te Kingeresa "Vision statement," (enduaata e kanisa) Ore ina bae naa keaku enkoitoti naasishore kanisa nitii pee eas nena baa. Neaku, keidimayu pee eata inkanisani inkoitoti naapaasha. Kake ore pooki naa keipirta elikioroto ororei le Nkai, enkitubulunoto e kanisa, o enyorrata olkulikae.

*Inkitanyaanyukot naipirta nena baa pee eibalayu eninko pee impanka isiaitin e kanisa.*

**ENDUAATA** - Kitii enkop oo Lmaasai anaa kanisa pee kilikioo, nikisiai, nikintubulaa nikinchenoki ororei le Nkai (Ilomon supati le Yesu). Nikiun inkanisani naaun inkulie anisani.

## **ENKIPANKATA - MATADAMU ELIKIOROTO OROREI LE NKAI TENEBO EUNOTO OO NKANISANI.**

Ekiindim aatejo kiyieu nikias kuna baa tialo elikioroto ororei le Nkai. Matadamu aajo ebaiki naa keidimayu pee easayu embata e kuna baa tiatua erishata dorrop. Ore inkulie baa naa keidimayu pee eya ilarin oata esiana pee easayu.

1. Kiyieu nikiretu iwuejitin netii ilairukok kake eton mme kumok, metaa keyieu lelo kuti airukok eretoto pee elo dukuya kanisa teine.
2. Kiata oshiake iwuejitin ng'ejuko aashu matejo ewueji nemetii ilairukok nikigira aaret pee ejing kanisa ine.
3. Kiyieu shoruetisho tenebo ilmusheni o nkanisani naatii America pee kipuo dukuya te likioroto ororei le Nkai.
4. Ekitum enkoitoi pee kinteng'en ilalikiorok pee eng'enu tialo ororei le Nkai nemepong'ori.
5. Ekintisip oleng ajo keyiolo ilalikiorok pooki eneiko pee eisom Bibilia neiger sii irorei.
6. Enkisoma naipirta enkibatisa tenebo imbaa naagol naaponu teneaku iltung'ana ilairukok. Ore pee ejo oltung'ani keyieu neaku olairukoni nenare nejing ina kisoma.
7. Ekitum enkipankata pee kigelu ilairukok endaa nikimanaa aabaiki iltung'ana aaliki ninche ororei le Nkai niking'arie ina daa nikiomonoki sii.

8. Ekintayu intokitin ang te leng'on pee kiretu ilalikirok pee etum erishata metolikiorie ororei le Nkai.

9. Nikipuo iyiook ilairukok aabaiki ewueji nebo pee kintagol ninche nikiaata sii enchula tenebo.

10. Keya nikipuok enkolong nabo pee kipukoo aomon tenkaraki elikiroto ororei le Nkai.

11. Ore inkulie katitin kiata irishat pee kiomon oleng tenkaraki ilkulikae leitu eiruk.

**ENDUAATA** - Nikinteng'en iltung'ana pooki te kanisa anaa enairirikino embulunoto enye.

## **ENKIPANKATA- ENKITENG'ENARE E KANISA**

### **Kiyieu nikias kuna baa:**

1. Kiyieu nikiata enkiteng'enare sidai nagut te rishata e Jumapili tenetumo iltung'ana pooki te kanisa.

--- Ore tenkaraki ina yieunoto ekirriwaa olpastai lang skuul pee eyiolou Bibilia tenguton pee eretu iyiook.

2. Ore oltung'ani pooki oyieu neiteng'enisho te kanisa keirorie olpastai ninye pee etum enkipankata sidai nesipu ajo megira apong'ori te nkisoma enye.

3. Kinyok oleng pee kitum enkipankata e Sunday skuul (enkiteng'enare oonkera).

--- Neaku, king'oru ilmalimuni pee etum sii ninche enkiteng'enare pee eiteng'en inkera aitobiraki.

--- Niking'oru sii enkoitoi pee kitum imbukui nikiasishore tenkiteng'enare.

4. Ekinteng'en intoiwuo pee eiteng'en inkera enye too nkajijik enye.

5. Ekiiyieu enkiteng'enare enkumparu too lairukok pooki ooyieu neiteng'eni pee eidim aaisoma Bibilia o mbukui naaiteng'en iyiook ororei le Nkai.

6. Kimpanka sii pee kiata enkisoma tenebo olturrur loo ltung'ana ooyieu neibatisai.

7. Nikiyieu sii enkisoma o lapaitin are naipirta ilairukok ng'ejuko o imbaa naanare neas ninche o imbaa naanare neyiolou egira aiteru ina oitoi e Yesu. Nikinteng'en sii ninche naipirta olkuak, inkopa o enkiteng'enare e kanisa ang.

8. King'oru enkoitoi pee etum sii lelo tung'ana lemeyiolo enkisoma enkiteng'enare.

9. Kinyok pee kitum enkiteng'enare oonkituak naara inkairukok pee epuo dukuya.

10. Ekimpanka inkisomaritin naaipirta imbukui naaigero Saruni pee kisipu ninche tenguton.

11. Ekipik imbukui e Saruni inkasetini pee ening iltung'ana lemeyiolo enkisoma.

### **Iretot nikiyieu pee easayu nena baa pooki:**

-- Ekiiyieu nikishet enkaji pee etum iltung'ana pooki erishata pee etum enkiteng'enare.

-- Ekiiyieu nikishet ewueji pee etum inkera enchula tenebo enkisoma, neiguran sii.

-- Ekiiyieu ewueji pee kipik imashinini pee ening iltung'ana inkasetini naaipirta ororei le Nkai.

-- Ekiiyieu shoruetisho tenebo olmusheni pee elo dukuya enkumparu.

-- Ekiiyieu ewueji neirrag ilomon teneponu inkoosi.

**ENDUAATA** - Nikiretu sii iltung'ana lemeidim ate pee eibalayu enyorrata Enkai tiatua iyiook. Nikidamu kuna yieunot enye:

1. Endaa, inkilani o nkajjik

2. Eseriani tenebo Erripore

3. Olmarei o lchoreta

4. Eyioulounoto oo mbaa o enkanyit

5. Keyieu neretu ilkulikae

6. Keyieu netum Enkai.<sup>17</sup>

7. Embiotisho

8. Enjeunoto tiatua Yesu tenebo elakunoto nasipa

9. Enkipirta tena kop tenebo osiligi

**ENKIPANKATA - NAIPIRTA ERETOTO OOL-TUNG'ANA TIATUA KANISA O TE MURUA**

1. Ekigelu olmarei obo nikiuloki ninche pee kiretu ninche o metabana neidimu ate. Nikinyok oleng pee mikiaku ake iloopiak tina kipankata.

2. Ekinyok oleng pee kiretu iltung'ana pee etum enkoitoi nasilie enkare naoki pee meitoki apikisho imueyaritin.
3. Ekisuj Iasat 2: 44, 45 te kanisa anaa enataasa kanisa e Kristo e dukuya pee kiretu iltung'ana oota enyamali.
4. Ekinyok oleng pee kitum enkoitoi pee etum pooki marei emukunta naata olpaashe le sekenkei pee mejing ng'uesin.
5. Eking'oru enkipankata pee etum pooki marei enkima sidai tiatua inkajjik enye pee metum inkera enyamali.
6. Ekiramat oleng iltung'ana ooshal anaa enalimu Yakobo te mbuku enye 1: 26, 27. Ing'orai sii Is. 1: 16, 17; Iasat 6: 1; Isaya 58: 6-12.
7. Eking'oru enkoitoi sidai pee kiar ilojong'a pee meyau imueyaritin tiatua iltung'ana.
8. Eking'oru sii enkoitoi sidai pee kiar enkojong'ani pee meyau oltikana.

**ENDUAATA** - Pee kigelu nikinteng'en ilarikok le kanisa. Nikiata ilarikok ooas esiai enye.

**ENKIPANKATA - ERIKORE E KANISA**

Nkitanyaanyukot ake kuna. Kiyieu nikias kuna:

1. Ekiiyieu ilarikok oodupa te kanisa inchere ilarikok tenebo ilaretok. Nikiyieu sii inkarikok tiatua intomonok.
2. Ekiiyieu nikisipu oleng ajo keyiolo olarikoni pooki esiai enye te kanisa. Neaku, ekinteng'en ilarikok pooki esiai enye nikinkok pee eas te nyuaata, eng'iriat, enyorrata o nduaat.
3. Ekiiyieu nikiata ilturrurri ooipirta isiaitin e kanisa nikiata sii oltung'ani oitasheiki olturrur pooki pee epuo dukuya aas esiai enye.
4. Nikiiyieu olupastai onoto enkiteng'ena nagut ororei le Nkai pee eiteng'en iltung'ana aitobiraki.
5. Ketumo ilarikok aaimaki imbaa e kanisa enkata nabo te wiki.
6. Keiteru ilarikok aadamu kanisa anaa olmarei neiturukie imbaa e kanisa neng'amu esiai e kanisa anaa esiai enye. Nepal inkitolonyat neas esiai e kanisa te nyuata sapuk.

**ENDUAATA** - Nikinyok sii pee kiata eseremare sidai naitiship Enkai.

## **ENKIPANKATA NAIPIRTA ENKISISA AASHU ESEREMARE E KANISA**

### **Ekiiyieu nikias kuna:**

1. Kinyok oleng aadamu aajo kitii kanisa pee kisis Enkai, Yesu o Enkiyang'et Sinyati mme pee kintiship iltung'ana (Ing'orai Matayo 6: 1-18).

2. Aatum enkipankata pee kimpanka inkiasin e kanisa aitobiraki. Neaku, kias kuna:

--- Ekitum olturrur oipanka inkiasin e kanisa tempolos e wiki eton eitu elotu Jumapili.

--- Ekimpanka imbaa pooki anaa erishata e shakenisho, endaa Olaitoriani, enkisoma, isinkolioitin o inkomonoritin.

--- Ekimpanka erishata enkitoomono sidai tinikindip enkisoma. Ore ina rishata naa kenare nerripi pee eiririkino inkomonoritin enyamali pooki. Tena keipirta oltung'ani ojo keyieu nejeu nenare nikiomonoki ninye anaa enairirikino enkoitoi enjeunoto. Amu, keibala enkoitoi enjeunoto inchere pee eiruk oltung'ani, neirridu, neibalunyie Yesu anaa Olaitoriani, neibatisai. Neaku, ore tina kata kiomonoki ninye pee etum engolon pee esuj enatejo Enkai tororei lenye tenaipirta enkoitoi enjeunoto.

Ebaiki nikipik sii ninye atua enkisoma naipirta enkibatisa o enkoitoi enjeunoto.

3. Kiiyieu netum olupastai enkipankata oo nkisomaritin pee kitum enkiteng'enare nairirikino enkoitoi Enkai telulung'ata. Neaku, ketum ninye enkipankata.

4. Kinyok oleng pee mikiata enkilepilep tiatua erishata enkomono amu kejo Bibilia meishiakino ina (1 Ilkor. 14: 23, 31, 32,40).

5. Keya nikiyieu nikitum erishata sapuk enkomono pee kiomonoki inyamalaritin pooki.

6. Nikirrip erishata enkisoma pee meponu iltung'ana aaiteng'enisho imbaa nemesipa aashu eponu aayau enchankar e pesho.

7. Nikintobir isinkolioitin aiuloki likisisie Enkai o Yesu too nkorroki ang maate. Ore enkitanyaanyukoto osinkolio obo naa ele ojo, "Kanyor iyie Enkai Papa, kaanyor iyie Enkai enkerai, kaanyor iyie oltau sinyati, kaanyor iyie Enkai euni te nabo."

**ENDUAATA** - Nikinyok oleng pee kisuj enkoitoi e sinyatisho tiatua enkishui ang.

## **ENKIPANKATA- SINYATISHO OOLTUNG'- ANA OOTII KANISA**

### **Ekiiyieu kuna:**

1. Nikinyok oleng pee kirridu te sipata tenguton metaa ekiboloki Enkai iltauja lang pee elotu ewang'an ajing

irishat pooki.

2. Ore enkilikuanata e dukuya te iyiook ilairukok naa inchere kainyioo eyieu Enkai te nkishui ang? Alang tinikidamu aajo kainyioo kiyyieu iyiook. Ekiomon Enkai pee kiyiolou eyieunoto Enkai te sipata.

3. Kinchoru iseseni lang anaa olasar oishu anaa enajo Iroma 12: 1, 2. Metaa kiramata iseseni lang nimikiashi-shore intokitin nainyial iseseni lang. Nikirrip sii iltauja lang, inkonyek ang, inkejek, o inkaik ang pee mikias embae nemesinya.

4. Ekiyuj enkoitoi esipata (Efeso 4: 25) nikimbalunyie sii ng'ok ang anaa enajo 1 Yohana 1: 5-10.

5. Ekiyyieu nikiboitare ileitu eiruk anaa Yesu pee kiyietu ninche enetii Yesu kake ekiyyieu nikirrip sii ate pee mikidoiki atua ng'ok enye.

6. Ekiyyieu nikiata irishat pee kiomonoki olikae olikae tempolos e wiki.

7. Nikinyok oleng pee kisuj enkoitoi ererito Enkiyang'et anaa enajo ina Buku naata ina arna naigero Saruni Ole Ntaya (Paul Highfield).

8. Ekiyyieu enkipankata pee eeta oltung'ani pooki olchore lenye pee eibalunyie ng'ok enyena neomonokini.

**ENDUAATA** – Pee kiramat enkaji e kanisa o enkiwanja enye.

**ENKIPANKATA - ERAMATARE ENKAJI  
TENEBO ENKIWANJA E KANISA.**

**Ekiiyieu nikias kuna:**

1. Nikitum enkipankata sidai pee kiasishore enkiwanja e kanisa aitobiraki.
2. Nikitum induaat naipirta inkajijik nikipik enkiwanja naretu esiai e kanisa, ata tenaa mikidolita enkoitoi tenakata. Ekimpanka imbaa pooki te nkirukoto.
3. Ore pee mikiata enkiwanja niking'oru pee eibalayu ewueji e kanisa.
4. Nikiramat inkajijik pooki anaa inkunaang. Metaa kintuku, nikior, nikiramat. Ore pee erruoyo entoki niking'oru enkoitoi pee kintobir pee meaku shakenisho torrongo too ltung'ana le boo.
5. Nikidamu inkatitin pooki aajo inkajijik Enkai ninche pee kiramat tenkoitoi nasinya.
6. Niking'oru sola te kanisa pee kiata inchularitin kewarie.
7. Ore pee ebulu kanisa niking'oru inkajijik pee kiata inkisomaritin elelero. Metaa keeta enkaji enye pee eisoma Bibilia, neiguran, neeta irishat oo nchularitin.

**ENDUAATA** - Nikinyok sii pee kiata naboisho, o enyorrata tenebo inkulie kanisani. Kake kirrip sii inkanisani ang pee kisuj ororei le Nkai alang ilkuaki loo nkanisani oogilunore ororei le Nkai.

## **ENKIPANKATA - NABOISHO TE KANISA O TENEBO INKULIE KANISANI TE MURUA.**

### **Ekiiyieu kuna:**

1. Kanisa naitobir inyamalaritin to osotua.
2. Intumoritin tenebo inkulie kanisani ang pee eimaki imbaa e kanisa neipanka sii inkiasin naaipirare inkanisani pooki.
3. Naboisho tenebo inkanisani naatii America.
4. Naboisho tenebo ilmusheni.
5. Naboisho tenebo inkulie kanisani neme inkunaang. Metaa eton kiata ilkuaki lang oopaasha kake kinyok oleng pee kiata enyorrata tiatua iyiook. Neaku, mikilepie ate anaa iltung'ana ootubulutua alang ilkulikai (Ing'orai Yakobo 4: 1-10).
6. Ore inkulie katitin kintoomon iltung'ana ooling'uaa inkulie kanisani ang pee eponu intumoritin ang. Kake kintanap sii ninche pee esuj olkuak lang.
7. Ekinyok oleng pee kisuj enkikoo e Paulo te Efeso 4: 1-6 o te Ilfilipi 2: 1-11.

**ENDUAATA** - Kiyieu nikirerioo inyamalaritin.

**ENKIPANKATA NAIPIRTA INYAMALARITIN  
NAANARE NIKIRERIOO.**

**Ekiiyieu nikias kuna:**

1. Ore pee epuku enyamali te kanisa naa keyieu nikirerioo ina nyamali aasioki pee mebulaa.
2. Tenkitanyaanyukoto, ore pee eshuko oltung'ani te kanisa nikinyok oleng aashuku ninye tenyorrata, teng'eno, teng'iriata, o te enyuaata (Ilgalatia 6: 1-5).
3. Nikisuj sii Matayo 18: 15-17 pee kirerioo iltung'ana ootaasa ng'ok.
4. Nikijing'aki atua inyamalaritin tenkomono nikisilig sii eng'eno Enkai amu ninye nayiolo imbaa pooki.
5. Nikidamu 2 Tim. 1: 7 kigira aarerioo inyamalaritin. Nejo Paulo tine, *“Amu eitu eisho iyiook Enkai oltau le nkuretisho kake oltau le ngolon o le nyorrata o le nkibooroto e kewan.*”
6. Nikidamu sii Ndung'eta e Rashe 18: 17 kigira aarare inyamalaritin. Nejo, *“Ore ilo ong'as airo te dukuya nelioo aa kesipa enkiroroto enye o metabanaa nelotu likae ajur ninye.”*
7. Nikisuj enatejo Paulo to Lkolosai 1: 28, *“Ninye kilikioo, kinkok pooki tung'ani nikinteng'en pooki tung'ani te ng'eno pooki, peyie kitum aaitarasai pooki tung'ani etabayie tiatua Kristo.”*

**ENDUAATA** - Nikintayu ate aas isiaitin e kanisa te nyuaata, te nyorrata, te ng'iriata o tengolon Olaitoriani.

**ENKIPANKATA - INKIASIN E KANISA  
TENEBO ILTUNG'ANA OOAS NENA KIASIN.**

**Ekiiyieu nikidol kuna:**

1. Kinyok anaa enatejo Paulo to Lkolosai 1: 29, *“Enkaraki ena pee anyokita; nanyamaliki te ngolon pooki e nkidimata e ilo oisiaaisho tiatua nanu.”*
2. Ekitum enkoitoi pee kincho ilairukok pooki esiai te kanisa anaa enairirikino inkishoorot enye (1 Pet. 4: 10).
3. Ore pee meas oltung'ani eisiai enye naa ketii oltung'ani oikilikuan ninye ina siai.
4. Nikidamu aajo, *“Kira iyiook ilaisiaayiak tenebo Enkai; nirara intae enkurma enye, airara enkaji Enkai”* (1 Ilkor. 3: 9).
5. Nikidamu sii Ilkolosai 3: 23-24, *“Ore esiaai inyi pooki entaas too ltauja, anaa Olaitoriani iasakiki neme iltung'ana, iyiololo aajo to Laitoriani itumutumu enjung'ore anaa olekoisiayio linyi; Olaitoriani Kristo isiaaitata.”*
6. Nikidamu enkikoo e Paulo to Lkorintio le dukuya 12: 12-31. Amu kira osesen obo tiatua Yesu nenare neas irubat pooki esiai enye (Ing'ora sii Efeso 4: 16).

7. Ore pee eyieue neas oltung'ani esiai naje kake eton meeta eyiolounoto niking'oru enkoitoyi pee eiteng'eni.

8. Nikidamu sii aajo keeta irishat tipat toonkonyek Enkai. Kejo Bibilia, ***“Eng'ura entabaraki eninkunariri elototo, mme anaa iltung'ana oomoda kake anaa ilng'eni, entaasishore enkata, amu torrok inkolong'i”*** (Efeso 5: 15, 16). Netii sii oltung'ani otejo ena: “Ore enkishui ang naa etiu anaa oldakikai ake. Laa isekondi ntomoni ile ake eeta, Kelotu oldakikai te rishata enye nimiata enkidimata pee imbooyo.

Eitu ing'oru, neitu igelu,

Kake iyie etiorie pee iasishore.

Naa ore pee miasishore ilo dakikai naa ekinosu te siadi.

Nikinguenare sii Enkai ti niasishore tenkoitoyi torrongo, Naa erishata kiti oleng ilo dakikai,

Kake ketii enkishui o ntarasi atua ina kiti rishata, oldakikai obo ake.”<sup>18</sup>

Neaku, mataasishore irishat ang aitobiraki amu keeta pooki dakikai tipat oleng.

9. Nikiyieue nikimpim inkiasin nikias pooki. Kejo ororei le Nkai, ***“Kake eneneng'a pooki toki, embung'a entukurraki ina sidai, entalam empukunoto pooki e ntorroni”*** (1 Iles. 5: 21). Neaku, ore pee kigelu esiai nabo nikias nikipuo

dukuya aas naa keyieu nikimpim sii ina siai tenjurrunoto nagut pee kisipu oleng aajo ekisujita eyieunoto Enkai. Ore pee kidol ajo meloito dukuya esiai nabo naje naa keidimayu pee kirerioo aashu ore pee kidol aajo meitobirayu naa keidimayu pee kupal katukul. Neaku ore inkatitin pooki tinikigira aaimaki inkiasin e kanisa nikinkilikuan ate aajo kaji kinko pee kirerioo inkiasin e kanisa? Ing'orai Ilkol. 3: 23. Amu, kiasita esiai Olaitoriani neaku kenare nikias te nkarriyiano. Ketii endung'et Erashe musana najo, *“Tena keasisho mintobir.”* Kake ore te iyiook ilairukok keikash endung'et Erashe ng'ejuk najing erishata ina musana najo, *“Tena keasisho ntubulai.”*<sup>19</sup> Metaa, keikash tinikidamu anaake enkoitoi pee kintubulaa inkiasin ang alang tinikitoni ake nemetii enjurrunoto.

## **KAA KIAS?**

Aishorua nena kitanyaanyukot pee epuo ilarikok le kanisa dukuya aipanka imbaa pooki e kanisa. Nesuj ina kipankata pee eipanka imbaa naairirikino kanisa enye o wueji netii ninche te mbulunoto e kanisa. Amu, kepaasha inkanisani neaku kenare nikimpanka imbaa te nkoitoi naret kanisa naje. Metaa keaku keeta inkanisani pooki enkipirta enye. Kesipa ore inkanisani pooki naa keipirta elikioroto ororei le Nkai o enkitubulunoto e kanisa, o enyorrata

oolkulikae, kake keeta sii inkanisani pooki enkipirta enye aa enkorrok enye.

Neyieu sii neipanka nena baa too nduaat naaing'uaa Enkai. Nepik enkirukoto, osiligi, inkiasin, enyorrata, enyuaata, o eng'iriata.

Ketii inkoittoi sidain naanare nikisuj tinikias ina. Kejo Ilmaasai inchere, "*Meitainoyu enkiring'o e atua etii eni oriong*,"<sup>20</sup> aa inchere kenare neeta pooki toki enkipankata metaa keas isiaitin tenkoittoi nairirikino. Nejo sii, "*Melonyanyu meng'oruno*,"<sup>21</sup> aashu "metanyai." Nejo sii, "Meokoyu enkare eton eitu edou," aa inchere aisidai teneipankaki olpastai iltung'ana isiaitin te kanisa pee idol ilooning, ore ilemening'isho nitumoki atererio ninche.

### **Naa inchere:**

1. King'as aata erishata enkomono pee erik Enkai iyiook neutaki iyiook eyieunoto enye. Nikiomon sii pee eibooyo Enkai iyiook tenaa ekigira aapong'ori.

2. Nikintoki aata erishata pee kidamu aashu kimpiru imbaa. Ore tiatua ina rishata keeta oltung'ani pooki elakunoto pee elimu indamunot enyena. Naa menare negilunore oltung'ani indamunot oo lkulikae. Amu, kejo Ilmaasai, "*Keaku nameni eriroi*,"<sup>22</sup> aa inchere ore pee ijo meaku toki oltung'ani aashu ai toki ake naa keidimayu pee eibelekeny Enkai imbaa metaa keeta tipat tesiadi ina toki nameni tedukuya. Neaku, ore ina rishata naa erishata pee easisho Enkai tiatua

iyiook pee kitum indamunot kumok eton eitu kijing erishata enjurrunoto e nena baa. Ore kuna baa naa keipirta enkipirta e kanisa naje aa enkorrok enye te wueji enye. Ore ai kipankata naidimayu naa pee edamu olupastai induaat nelotu ninye ayaki ilarikok pee eimaki. Kake keng'as aipanka olupastai indamunot enyena tenkomono neyaki ilarikok. Nenare nening sii Olpastai indamunot oolkulikae.

3. Neimaki pooki nena duaat tenjurrunoto nagut oleng pee enyorrakino ninche. Nikiimaki tenaa ekiiyieu nikias embae naje te sipata aashu kipal.

4. Ore pee edamu enduaata naje nedamu inkoitoi o mbaa naaret ina kipirta. Nedamu sii ajo kainyioo eipirta ina duaata aa erikore e kanisa, elikioroto ororei le Nkai aashu ai kipirta e kanisa ake. Ore enkoitoi nabo naret iyiook pee kias ina naa pee kidamu enikijo oshiake naipirta imbaa nikiiyieu te kanisa. Ebaiki natejo apa tenaa ekiata entoki naje aashu enkipankata naje naa eisidai oleng. Neaku, matadamu kuna baa pooki nikitejo amu keidimayu pee easisho Enkai tiatua nena damunot neasayu.<sup>23</sup>

5. Ore pee kias ina nikintoki aaimaki aajo kaa kias pee easayu nena duaat. Ore sii pee kigelu kuna baa nikiiyieu nikias te sipata nikidamu aajo keya iyiook erishata naje tenebo Enkai pee kias.

6. Ore nena baa nikiyieu nikias teilo ari likitii naa ekimpanka oleng pee kias. Nikiimaki imbaa nikinturukie. Neiteru aing'oru inkoitoi pooki pee

easayu ina bae. Nenyok anaa Paulo pee ejo to Lkolosai 1: 29, ***“Ninye kilikioo, kinkok pooki tung’ani nikinteng’en pooki tung’ani te ng’eno pooki, peyie kitum aaitarasai pooki tung’ani etabayie tiatua Kristo. Enkaraki ena pee anyokita; nanyamaliki te ngolon pooki e nkidimata e ilo oisiaaisho tiatua nanu.”***

7. Nikigelu iltung’ana ooitashеiki nena baa pee easayu. Amu, pesho tinikiimaki aajo kenare neasi nena baa kake metii iltung’ana ootegeluaki pee eitadamu ilkulikai pee eas.

8. Nikiomon Enkai oleng pee erik iyiook amu kiyieu nikias eyieunoto enye te rishata enye, te nkoitoi enye. Neaku, kenare nikiomon oleng pee kias enayieu Enkai nimikipong’ori. Neaku kiomon Enkai pee eretu iyiook. Kake kiomon sii tenkirukoto o te nduaata. Nikiyiolo katukul aajo keidim Enkai ataasa imbaa nimikiindim iyiook tenemetii ninye. Neaku ata tinimikidolita enkoitoi tenakata, ekipuo dukuya aaipanka imbaa tosiligi sapuk oleng. Amu ore pee aa eyieunoto Enkai ina bae nikinyok sii iyiook, naa keidimayu katukul pee easayu.

9. Nikidamu pooki inkoitoi nikiindim ataasishore pee easayu kuna baa nikipuo dukuya aaipanka ninche.

10. Nikintoki aadamu enkipirta pooki e kanisa pee kisipu aajo mikigira aaitiak embae nabo naata tipat te iyiook. Amu, kesipa keeta kanisa enkipirta enye

neiuloki sii imbaa naaje kake kenare sii nedamu inkulie baa pooki pee meshalu kanisa te nena.

11. Ore pee kias embae naje nikijur inkitapong'ot pooki pee king'enu nikincho Enkai enkisisa pooki. Neaku, ore pee kias embae naje erishata naje nenare oleng pee kintoki aaimaki aajur oleng tenaa ekisujita enkoitoi sidai. Ore inkulie katitin naa kenare nikipal embae naje tenkarakiki meekure eishiakino. Keeta pooki toki erishata enye. Metaretu iyiook Enkai.

12. Keidimayu sii pee eas emurua (clusta) ina aa enkipirta oombaa naas emurua (clusta) tenebo neas sii inkanisani pooki aa kanisa enye te murua enye. Naa eisidai teneibung'akino enkipirta e murua (clusta) o enkipirta e kanisa natii ina murua (clusta).

13. Ore pee kitum induaat naa keyieu nikinteng'en ilairukok pooki le kanisa nena baa pee eibung sii ninche te nkirowuaj. Nikiliki tiatua inkisomaritin ang te Jumapili. Kejo Ilmaasai inchiere, "*Ore enemeshula inkiku nemeshula enkiguena,*"<sup>24</sup> aa inchiere kenare nikiimaki imbaa pee kitum enkipankata nabo sidai.

## *Olpastai*

Ore eton eitu kipuo dukuya kayieu nikidamu esiai olpastai naipirta induaat e kanisa. Amu, ore pee meeta ninye induaat sidain naa kegol oleng pee epuo ilkulikae arikok dukuya. Amu, kegira ninche aanyu ninye pee erik ilkulikae.

Ore inkulie katitin kepik olupastai ilkulikai intiot. Kejo ninye ore pee etem aipanka imbaa nemenyok ilkulikae arikok. Ore tenkaraki ina neshalu ninche nemenyok sii ninye. Kake keyieu neeta olupastai enyuaata oleng nemesioki adukenya. Amu, ore pee edukenya olupastai nedukenya sii ilkulikae. Neaku, kenare nelo dukuya olupastai to siligi, eng'iriata, o nduaat pee eirowuajie ninye ilkulikae. Ore pee melo kanisa dukuya keyieu niking'as aadamu tenaa ekiata olupastai oata enyuaata, eng'iriata, o nduaat. Nemesioki ashalu tenkaraki ilkulikae tung'ana. Etejo Paulo to Lgalatia 6: 9, ***“Ore aa isupati kiaasita emikidukenya, amu kelotu enkata nikisotisho te neitu kintololong enyuaata ang.”***

Neaku, ore pee mikiata olupastai oata enyuaata o nduaat naa kenare nikidamu enikias amu kesipa katukul mebulu kanisa tenaa mera olupastai olarikoni odupa oata nduaat.

Ore pee etii olupastai oata enyuaata o nduaat sidain nenare nesuj ilarikok ninye. Amu, ore pee eshal ilkulikae arikok naa kegol oleng pee enap olupastai olola openy. Keyieu eretoto pee medukenya.

Ore enairirikino oleng naa pee eimariri olupastai Yesu Kristo pee medukenya. Amu, ore pee eing'or ninye ilkulikae aashu inyamalaritin ake naa keshalu (Ilheb. 12: 2; Mat. 14: 22-33).

## *Iroruat naaret olupastai pee etum induaat sidain*

**1. Tayiolo kewan** - Tayiolo tenaa iata enkishooroto pee ias ina siai. Amu, ebaiki nijo iyieu nias kake miata enkishooroto pee ias. Etejo 1 Petero 4: 10, *“Taasishore inkishoorot naaba anaa inikinchooki aisiaayie ilkulikae, anaa olaing’urani supat te mpiris e Enkai oo mpukunot kumok.”* Ore pee miata inkishoorot pee ias esiai olupastai anaata inyorraa ina nigelu ai siai nias alang te nerruoyo kanisa tenkaraki iyie aashu ebaiki neitashe tenkaraki nimiata induaat sidain naipirta esiai e kanisa.

Inkilikuana sii kewon ajo ainyoo pee iyieu nias ina siai olupastai. Amu, tenaa iyieu nias ina siai olupastai tenkaraki olwuasa aashu tenkaraki iyieu nintore ilkulikae naa keikash tinipal alang tininyial kanisa. Neaku, tisipu oltau lino pee milo dukuya tina siai tenkaraki imbaa torrok.

Tayiolo sii ajo kakua siaitin aashu induaat inyor oleng nindim ataasa tenchipai oleng anaa ninche iyieu ninturukie too mbaa pooki. Amu, ore pee isipu nena baa nilo dukuya aas. Neidimayu pee ing’oru ilkulikae tung’ana oas nena kulie baa niminyor aashu nimiindim iyie ataasa. Kake matadamu aajo ore inkulie katitin ketii isiaitin nimikinyor kake lasima pee kias amu metii likae oas. Kake ore pee kias

ninche teng'iriata ebaiki nelotu erishata pee kitum likae tung'ani oidim ataasa nena siaitin.

**2. Tayiolo iltung'ana** te murua ino, iltung'ana te kanisa ino, iltung'ana ootii inkulie kanisani. Tayiolo sii inyamalaritin naata iltung'ana naamitiki eponu kanisa. Ore pee isipu imbaa naaipirta lelo tung'ana pooki naa ekiretu iyie pee itum induaat naaipirta kanisa.

**3. Tayiolo Enkai.** Toinyuaa oleng tayiolo ororei le Nkai tenguton. Tisipu ilarikok ootii Bibilia pee iyiolou inkoitoi naataasishore ninche pee eyiolou eyieunoto Enkai. Inturukie oleng enkomono pee ining enayieu Enkai. Tadamu sii pee ipukoo aen kewon inkulie katitin pee ining Enkai.

**4. Inkilikuana ilkulikae** arikok le kanisa enaipirta induaat inono pee itum enkikoo enye pee mipong'ori. Kejo Ilmaasai, *“Meishaa elukunya nabo ng'eno.”* Kejo ororei le Nkai, *“Ore enemetii erikore, naa kebatata olorere; kake ore enetii ilaikook kumok netii eseriani”* (Ndung. 11: 14). Nejo sii, *“Toning'u enkikoo ning'amaa enkiteng'enare, pee itum anoto eng'eno too nkolong'i naapuonu”* (Ndung 19: 20). Neitoki ajo, *“Ore nkitobirat pooki neitasheyieki te nkiguana; terikore natii eng'eno atua epuoi olarrabal”* (Ndung. 20: 18).<sup>25</sup>

## **EMATUA E ONG'UAN**

Inkitanyaanyukot naaret iyiook matodol kuna baa

### ***Induaat e Yesu***

Keliki iyiook Luka 4: 18 enaipirta enduaata e Yesu, nejo, ***“Etii enkiyang’et o Laitoriani atua nanu, amu aatubukoko ninye e ilata, aput, naairriwua matoliki laisnak ororei supat, nalaku te sinkaisho ilooena, naliki lmodook emboloto oo nkonyek enye, nalaku aisho epuo, lelo ootorogonyaki, nalimu olari osarunye Enkai iltung’ana lenyena.”*** Keipirta ele kereri kuna baa pokira ong’uan:

1. Elikioroto ororei le Nkai
2. Elakunoto tiatua Yesu
3. Pee edolisho lelo lemedolisho
4. Elimunoto e njeunoto

Ore ai bae naipirta enduaata e Yesu naa inchere keeta enduaata pee esuj enkoitoi emborron, enyorrata, olong’ur neme enkoitoi engolon, enkisimakinoto, enara, olwuasa le nkop, o masaa kumok. Keliki Yesu iyiook enaipirta ina bae te Marko 10: 35-45. Neliki ninche ajo ore tena kop naa keeta ai kipankata metaa keitore iltung’ana tengolon kake ore ilairukok naa keitadou ate neisiai ilkulikai, nejo, ***“Kake mme neijia etiu te intae; kake ore olinyi oyieu neaku kitok neaku olaisiaayiani linyi, ore oloyieu neituruk***

*neaku osinka le pooki. Amu eitu elotu Enkerai e Tung'ani meisiaai kake eewuo aisiaaisho, neishoru enkishui enye metaa elakunoto oo lkumok*" (Marko 8: 43-45). Neaku eibelekenya Yesu imbaa metaa keeta enduaata pee eeta iltung'ana emborron neisiai ilkulikai alang tenesuj enkoitoi enkop aa inchere pee eisimaki imbaa, neas to lwuasa. Keliki Yesu iyiook ina pukunoto te Matayo 5: 1-12. Eibelekenya Yesu imbaa amu ore enkop nemejo ninche kemayiana lelo tung'ana. Kake ore entoki naata tipat oleng naa iltauja lang. Neaku, kejo Yesu kemayiana oltung'ani obor. Nemayiana oltung'ani oyiolo enchalan enye. Nemayiana oltung'ani oishir tenkaraki ng'ok enyena o ng'ok oolkulikai. Nemayiana oltung'ani oata olng'ur. Nemayiana oltung'ani oata oltau sidai. Nemayiana oltung'ani onyok oleng aitayu osotua. Ore lelo ootum inkisilisilot tenkaraki Yesu naa kemayiana sii ninche.

Neaku, ore taata kigira aas esiai e kanisa too nduaat naa kenarikino nikias imbaa pooki temberron o tenyorrata.

Neeta sii Yesu **enduaata pee eye** (Marko 8: 31-33). Ore apa tina rishata keeta iltung'ana induaat naaipirta oltung'ani olotu anaa Messia nearaa Ilroma tengolon. Kake eitu esuj Yesu ina oittoi. Etusuja enkoitoi natiu anaa enchalan (2 Ilkor. 13: 4). Kake eibelekenya Enkai ina shalan metaa engolon.

Neaku, ore sii ninche iyiook kenare nikiye te nena baa torrok anaa olwuasa, erripore enkishui ang alang

esujata Enkai, o nkulie ng'ok pooki osesen (Iroma 6:8- 14; Marko 8: 34-38).

### *Induaat e Paulo*

Ore tiatua embuku e Timoteo li are 1: 11 kidol induaat e Paulo. Nejo ninye tine, ***“Te nkaraki ele rorei aategeluaki mataa olalikioroni o Lkipaaret o laiteng'enani...”*** Neliki sii iyiook embuku o Iasat 9: 15, 16 naipirta induaat enyena, *“Kake etiaka Olaitoriani, ‘Shomo amu, emasaai ai nageluno ninye pee eya enkarna ai aitayiolo iloreren, o laiguanak o nkera e Israel; amu kaliki nanu eneba enkitamioto naitamei ninye te nkaraki enkarna ai.’”* Idolita ajo ore te sipata naa keeta Enkai induaat te ninye metaa kesujita Paulo induaat naanoto ninye naing'uaa Enkai.

Ore likae kereri oliko iyiook ai duaata e Paulo naa Iroma 15: 20 pee ejo ninye, *“Naitaa eyieunoto natii oltau elikioroto o rorei supat, neme te nene wuejitin neeidipaki aaipoto Kristo, pee meaku enkitamanyunoto e likae tung'ani alotu ashet...”* Keeta Paulo enduaata pee elo iwuejitin ng'ejuko pee eliki iltung'ana leitu aikata ening ororei le Nkai. Neaku, eisidai sii teneeta kanisa enduaata pee elo iwuejitin neetii iltung'ana leitu ening aashu etoning'o enkite kake eton eitu eibung (Ing'orai sii 2 Ilkor. 10: 15-17).

Keeta sii Paulo enduaata pee eaku olkilikuai le Yesu amu etejo to Lkorintio le are 5: 20, *“Neaku, kira*

*ilkiliku le Kristo, Enkai makewan, nasaisho te iyiook. Kitasayia intae te Kristo entoning'ore Enkai.*" Neaku, keeta Paulo enduaata anaa olkilikuai le Yesu. Metaa kegira Enkai aasishore Paulo pee eitutum iltung'ana o Enkai too lomom supati. Keyieu ninye netum iltung'ana eseriani tiatua Yesu amu ore eton metii atua Yesu etiu anaa ketii mang'atisho tiatua oltung'ani o Enkai. Kake ore pee eng'amu ilo tung'ani Yesu o enkoitoi enjeunoto nelotu eseriani tenebo o naboisho.

Matonyok sii iyiook pee kisuj enkitanyaanyukoto e Paulo mataa iltung'ana oitutum ilkulikai.

### ***Enduaata e Nehemia***

Keliki iyiook Nehemia 2: 12 naipirta enduaata e Nehemiah natang'amua te Nkai, nejo, ***"...neitu nanu aliki oltung'ani hoo obo, ina natipika Enkai ai atua oltau lai, pee alo aitaas Yerusalem."*** Keeta ninye enduaata pee eshet enkaji Enkai kake enoto enkoitoi sidai pee elo dukuya. Neitu esioki alimu eton eng'or erishata.

Neitoki ninche aapuo dukuya aashet enkaji hoo netii iltung'ana lemenyor enaasita ninche. Ore te rishata nabo neyieu neesek iltung'ana Nehemia pee epal esiai kake eshomo dukuya Nehemia aiuloki esiai enye neitu epal (Nehemia 6: 1-19). Neaku, ore

tenkaraki enduaata enye nenoto eng'iriata o enkitieunoto pee eas esiai Olaitoriani.

Ore sii taata kenare nikisuj enkitanyaanyukoto enye metaa ore pee eisho Enkai iyiook induaat nikipuo dukuya te ng'iriata, te nkitieunoto o metaba anaa nikindip ina siai naishooki iyiook.

### *Enduaata e Mother Theresa*

Ore Mother Theresa naa ketii apa ninye atua kanisa a Katolik. Naa era ninye ina kitok naji “nun” metaa ketii atua ina siai naipirta kanisa o Enkai nemeeta olpayian. Kake ore nabo olong netum enduaata pee elo ninye enkop naji India aretu lelo tung'ana oora ilaisinak neeta sii imueyaritin naagol oleng. Meyieu ilkulikae tung'ana neretu lelo tung'ana kake etoning'o tiatua oltau lenye ajo keyieu ninye neretu ninche. Neretu ninye iltung'ana kumok oleng neaku oltung'ani yioloti oleng tenkop anaa oltung'ani oata olng'ur oleng anaa Yesu te sipata. Naa ore endung'et erashe enye naa pee eas imbaa kutiti tenkoitai sapuk. Metaa keas nena baa nemeyieu neas ilkulikae neas toltai sidai oleng tenkaraki Yesu. Kejo Ilmaasai, “*Eyaku nameni eriroi,*”<sup>26</sup> aa inchere matadamu imbaa kutiti.

Neaku, eisdai sii teneeta kanisa induaat naaipirta iltung'ana ooshal aashu iltung'ana lemeidim ate. Aashu iltung'ana oata imueyaritin naagol anaa

tenkitanyaanyukoto, biitia. Naa eisidai sii tinikiata enduaata pee kias imbaa kutiti te nkoitoi sapuk tenyorrata, tolng'ur, o tenchipai.

### *Enduaata e Martin Luther King, Jr.*

Ore ilo tung'ani naa olpastai apa ti America. Ore te dukuya neme oltung'ani apa oata eng'eno alang ilkulikai tung'ana. Kake enoto ninye enduaata pee eretu ilkulikai tung'ana oorok ti America pee etum elakunoto. Neas ninye imbaa enking'asia egira aretu iltung'ana oorok pee etum elakunoto. Ore ina rishata apa naa olari le 1960s. Enoto ninye inkisilisilot kumok oleng tenkaraki iloorok kake eshomo dukuya o metaba anaa nelotu enkolong natang'oroki ninye te ntiol neye ninye. Kake etareto ninye iltung'ana oorok oleng pee etum imbaa kumok sidain naaipirta elakunoto.

Ore sii taata ebaiki etii iltung'ana ooje oogira aatum inkisilisilot tenkaraki empukunoto enye. Kenare oleng teneretu kanisa ninche pee etum elakunoto nairirikino. Kiimakita enduaata e Yesu naa ore nabo enena naa pee elaku lelo oitorogonyaki.

### *Enduaata oltung'ani oji K. P. Yohannan*

Ore ilo tung'ani oji K. P. Yohannan naa Olmoindi ninye, naa olairukoni sii le Yesu. Keeta ninye enduaata pee ening iltung'ana ootii India ororei le

Nkai. Neeta enkipankata pee eretu inkanisani naatii America ilpastani ootii enkop enye pee etum erishata metolikio ororei le Nkai. Keeta enkoitooi pee eeku ketii ilaitashekinok neeta inkitanapat naaipirta ninche. Neaku, enoto ninye enkipankata sidai pee ening iltung'ana kumok ororei le Nkai. Ore pee iyieu nisom embuku enye naa keji, *Come, Let's Reach the World.*<sup>27</sup> (Keji te Kimaasai, "Wou, matabaiki enkop pooki.")

Neaku, kajo enduaata sidai ina tenaa ekias teng'eno o tenkoitooi e sinyatisho. Kake keyieu nikitum enkipankata sidai pee meng'uar iltung'ana impesai ake nemeas esiai enye aitobiraki aashu toltau sidai. Kejo Ilmaasai, "*Meishu enelikai okiyo (olokiyo),*"<sup>28</sup> aa inchere ore pee ipiak niyieu entoki naje tenkaraki kewon ake naa mesidai katukul. Ing'orai sii embuku e Yakobo ematua 4: 1-12 pee eimaki ina bae.

### *Induaat oo nkanisani*

Kang'as ajo ore kuna damunot naa enkipirta e kanisa naje aa enkorrok enye. Metaa keas sii inkulie kiasin e kanisa kake keuloki kuna anaa inkiasin naipirta kanisa enye kewon te murua enye anaa enajo ninche keiririkino tororei le Enkai.

1. Ore kanisa nabo naa ebaiki nejo ore enduaata (vision) ang naa pee eeku kanisa ang ewueji neponu

inkulie kanisani aatumie enkiteng'enare. Nikiata ewueji neponu sii elelero aatumie enkiteng'enare enye o ewueji neiguranie tenebo. Nikiaku sii enkitanyaanyukoto too lkulikae naipirta eramatare ooltung'ana lemeidim ate. Nikinteng'en ilalikiorok pee epuo aalikioo ororei le Nkai. Neun sii inkanisani.

2. Ore ai anisa nebaiki nejo ninche ore enkipirta ang naa pee kinturukie oleng elikioroto ororei le Nkai. Nikiasishore enkoitoi oo retot pee kias ina. Metaa kiretu iltung'ana tenkoitoi naje eton eitu kiliki ororei le Nkai. Nikinteng'en sii ilairukok metubulu sii ninche kake king'as aaiturukie elikioroto ororei le Nkai.

3. Ore ai anisa nebaiki nejo ninche ekiiyieu nikinturukie enkomono. Metaa kiata irishat kumok pee kiomon. Nikibaiki sii iltung'ana too nkang'itie aaomonoki iltung'ana. Kisipu inyamalaritin pooki nikiuloki ninche aaomonoki. Eton kiliki ninche ororei le Nkai kake kinturukie oleng enkomono.

4. Ore ai anisa nebaiki nejo ekiiyieu nikiuloki elelero pee kiyau iltung'ana kanisa. Nikiasishore enkoitoi oo nkguraritin pee keyietu elelero nikiteng'en ninche. Nikibaiki sii isukuuluni aaiteng'en ninche. Nikintoki aabaiki intoiwuo enye. Nikitum enkipankata pee kiasishore elelero oora ilairukok pee eas isiaitin te murua naayietu iltung'ana. Neiteng'en sii ilkulikae le risiori enye. Nikinteng'en sii ilkulikae

barnot ororei le Nkai tenguton. Neaku, enduaata pee kiyau iltung'ana kanisa ang.

5. Ore ai anisa neeta enduaata pee eyietu iltung'ana enetii Yesu neiteng'en iltung'ana metaa keiuloki elikioroto ororei le Nkai. Keasishore ilturrurri kutiti tiatua inkang'itie o tiatua kanisa. Neiteng'en sii ilairukok pee erikoo lelo turruri.

6. Neeta ai anisa enduaata pee eaku kanisa nagol oleng naidim ataasishore inkishoorot oo ltung'ana pooki pee ebulu kanisa. Amu, ore pee easishore oltung'ani pooki inkishoorot enyena netum kanisa engolon neas imbaa inking'asia. Neaku, kenyok oleng aiteng'en ilairukok pooki metaasishore inki-shoorot enye.

7. Nejo ai anisa ekiata enduaata pee kintodol iltung'ana enyorrata e Yesu. Neasishore enkoitoi eramatare ooltung'ana te kanisa. Neaku, kiramat ilairukok pooki metaa ekiretuno. Ore pee eata nabo enyamali nikiretu ninye. Neibalayu tooltung'ana leitu eiruk enyorrata e Kristo neyietu ninche kanisa.

8. Ore ai anisa nejo ekiata induaat pee kintodolu enkitoo e Yesu tiatua enkiteng'enare ang. Kinteng'en iltung'ana loompukunot pooki aaiteru too nkera kutiti o metabaike iltung'ana sapukin. Niking'oru inkoitoi kumok pee kias ina.

**Matadamu aajo eisidai tenaa keeta inkanisani pooki enkipirta enye aa kanisa enye te murua enye, kake eisidai sii tenedamu ninche ntipati pooki e kanisa pee meshalu kanisa tenkipirta nabo.**

*Inkanisani naasisho tenebo anaa emurua (clusta)*

**Ore inkulie katitin ketii inkanisani naasisho tenebo anaa emurua (clusta).** Naa ebaiki netii inkiasin naayieu ninche neas tenebo. Tenkitanyaanyukoto, ebaiki nejo inkanisani pooki e clusta (emurua) naje keyieu neun inkulie kanisani tenebo. Metaa keyieu netum induaat pee eun inkanisani te wueji enye aashu too wuejitin naaje.

Neaku, eisidai tenaa ketii oltung'ani obo oitasheiki clusta (murua) teina siai metaa keomon ninye Enkai aing'oru induaat sidain. Ore pee etum nelotu sii ninye ang'arie ilkulikai arikok tiatua nena kanisani pee etum ninye indamunot enyena. Neng'ar pooki indamunot pee esidanu nena duaat. Ore pee esidanu nenyorraa pooki pee eomon, nenyok oleng pee easayu nena baa.

Ore pee eiuloki induaat naaje naaipirta clusta (emurua) pooki nedamu sii irubat e nena duaat. Neitoki aadamu sii inkoitoi o roruat naasishore pee easayu nena duaat. Nedamu sii iyieunot naaret ina kipankata pee easayu.

Nepik enkomono empolos e pooki toki amu ene Nkai ina kipankata. Ore pee menyorraa Enkai ina kipankata naa kegol pee easayu tenkoitoi e sinyatisho.

### *Induaat olairukoni kewon*

Ore embae nabayie naa keipirta induaat naata olairukoni kewon. **Kenare neeta olairukoni pooki induaat naaipirta enkishui enye.** Metaa kedamu inkishoorot enyena nedamu irishat naata ninye pee eas esiai Olaitoriani (1 Petero 4: 10). Neomon Enkai oleng pee etum induaat naairirikino enkorrok enye. Nesipu sii ajo kainyio naata tipat te ninye oleng. Neing'oru enkikoo sii oolkulikae ootii kanisa anaa olupastai pee esipu inkishoorot enyena. Ore pee eyiolou nelo dukuya aisiai Olaitoriani te nkishui enye anaake. Kenare neeta olairukoni pooki enkipirta enye naibala. Ore pee eeta enkipirta enye neeta sii induaat naaipirta enkishui enye o esiai enye netum enkirowuaj naipirta enkishui enye metaa kening ajo keeta tipat. Ore igira adamu enkipirta o nduaat nidamu ininko pee isiai Enkai, kanisa, olkulikae tung'ana pee elo dukuya enkitoria Enkai tena kop. Ore pee iyiolou enkipirta o nduaat nilimu pee eyiolou sii ilkulikae pee kiretu iyie pee ias nimidukenya.

Ore sii ilarikok pooki le kanisa naa kenare neeta sii ninche induaat naaipirta enkishui enye o esiai enye

te kanisa. Ore inkulie katitin kejing oltung'ani erishata olarikoni kake meing'oru induaat pee eas ina siai aitobiraki. Neaku, oltung'ani oata enkarna olarikoni kake measita esiai olarikoni. Neaku, matonyok aaing'oru induaat naairirikino iyiook nikiomon Enkai pee eretu iyiook matusuj nena duaat te nyuaata oleng.<sup>29</sup>

Ore kuna baa te Kingeresa naa keji: **(1) Mission** – matejo **enkipirta ino** tena kop. Inchere ainyioo pee itii ena kop anaa olairukoni? Tenkitanyaanyukoto, ebaiki nejo oltung'ani pee enyor Enkai toltau lenye pooki nenyor sii ilkulikai nelikioo ororei le Nkai. **(2) Vision** – Ore vision naa **enduaata** niata naipirta enkishui ino kewon. Ainyioo iyieu nias iyie anaa enkorrok ino tenkaraki enkipirta ino tena kop? Ebaiki niyieu ninteng'en inkera te kanisa. Aashu ebaiki niyieu niun inkanisani. Aashu ebaiki niyieu niretu iltung'ana lemeidim ate. **(3) Values** – Inchere kainyio kuna **baa naata tipat oleng te iyie?** Matejo kakua sipat nareuta enkishui ino? Anaa ebaiki nijo **ening'oto naata tipat te iyie** pee ining Enkai. Aashu ebaiki nijo keeta **esipata** tipat oleng te iyie. Aashu ebaiki nijo keeta **olmarei** tipat te iyie. Nijo keeta sii tipat te iyie **embulunoto ino** tenkiyang'et ino tiatua Yesu **(4) Gifts** – Aashu **inkishoorot** inono. Ebaiki iata enkishooroto pee **inteng'en iltung'ana**. Aashu ebaiki ore enkishooroto ino naa **olng'ur** pee iretu

iltung'ana ooata enyamali. Kake kenare nisipu  
inkishoorot inono pee iasishore te nkitoo Enkai.<sup>30</sup>

## ENKETING'OTO

Kiyieu nikimbung endamunoto najo inchere kesipa ebaiki nimikiindim aataas imbaa pooki nikimpanka kake ore tengolon Enkai ekias eseshata.

Kake ore pee mikimpanka imbaa tenebo naa keidim-ayu pee mikias hoo ata nabo aitobiraki. Ore pee kiata enduaata nabo nikinyok sii naa keasayu imbaa. Kejo Ilmaasai inchere, "*Etapaashe enjore o laikitalak,*" aa inchere kenare nikimpanka imbaa tenebo nikiimie tenebo pee mikipaasha olkulikae.<sup>31</sup> Kake kesipa sii inchere menare nikisimaki imbaa. Kejo sii Ilmaasai inchere, "*Mesarayu enkishon,*" nejo sii Nai inchooki enkishon nayeng'iyeng'unye, aa inchere mataas pooki toki too mbarakinot nikisipu imbaa amu kejo Ilmaasai, "*Mme sarrisar nyayie sipuno.*"<sup>32</sup>

Matadamu aajo ore kuna baa pooki naa keyieu eng'iriata sapuk oleng. Kejo ororei le Nkai, "***Ore oltung'ani otonyorra enturore neitoki anang silig, nemeishiaakino enkitoria e Nkai***" (Luka 9: 62). Neaku, matonyok aapuo dukuya ata tenaa keponu intemat kumok amu kisiaita (working for) olchekut supat oji Yesu. Kejo sii Ilmaasai, "*Miput enkaya ejon,*"<sup>33</sup> aa inchere kenare nikiata eng'iriata pee easayu imbaa. Matadamu sii enajo Ilmaasai pee ejo, "*Menya olkileleng'i emala,*"<sup>34</sup> aa inchere ore pee kinyok oleng maa kutiti neasayu imbaa sapukin.

Ore sii kigira aaipanka imbaa kenare nikibaraki alang tinikias te siokinoto. Ketii oltung'ani otejo, "*Ing'as aipim inkatitin uni eton eitu idung.*"<sup>35</sup> Metaa ing'as adamu imbaa tenguton eton eitu ias entoki naje. Amu, ore pee ias te siekunoto kelelek pee ipong'ori. Nejo Ilmaasai, "*Erisiore entawuo nabo endukuya olee,*"<sup>36</sup> aa inchere kias maa kutiti kake keponu imbaa sidain tinikias aabaraki. Nikias sii alang tinikiimaki anaake nimikias. Amu, kejo Ilmaasai, "*Meeta enebaya olorora lenkutuk.*"<sup>37</sup> Nejo sii inchere, "*Medung olorora le nkutuk ong'ata,*"<sup>38</sup> Neitoki aajo, "*Opi kutuk oya enkop.*"<sup>39</sup> Nejo sii inchere, "*Mme kuetita toki sipuno,*"<sup>40</sup> (Aashu, "*Mme sarrisar nyayie sipuno*"). Nejo ti ai wueji inchere, "*Misirisiraa anaa inkuoo ngurle,*"<sup>41</sup> aa inchere taasa esiai ino aitobiraki. Nejo ororei le Nkai, "***Ore esiaai inyi pooki entaas too ltauja, anaa Olaitoriani iasakiki neme iltung'ana, iyiololo aajo to Laitoriani itumutumu enjung'ore anaa ole koisiaayio linyi; Olaitoriani Kristo isiaai-tata***" (Ilkolosai 3: 23, 24).

Nikias sii imbaa pooki teng'eno amu meyieu nikimbelekeny enkoittoi sidai tenkaraki eimusana ake. Amu, ebaiki eisidai ina oittoi musana alang enkoittoi ng'ejuk. Kejo Ilmaasai, "*Midol Kimanya,*"<sup>42</sup> aa inchere, ing'as asipu oleng ina toki musana tenaa eisidai amu ebaiki naa eisidai ina toki musana alang ina ng'ejuk. Kake imisioki adol eton itii atua ina bae.

Kenare nikias imbaa temborryon. Kejo Ilmaasai, *“Inosa (ake orkar) nijut enkutuk,”*<sup>43</sup> aa inchere kenare nikiata emborryon too mbaa pooki. Nejo sii Bibilia, *“Entadou ate te dukuya Olaitoriani, pee eilepie ninye intae”* (James 4: 10).

Kake matadamu enkoitoi pee kipuo dukuya nimikincho enkuretisho metimira iyiook amu melelek ina oitoo naa keponu sii intemat kumok. Kejo ororei le Nkai, **“Amu eitu eisho iyiook Enkai oltau le nkuretisho kake oltau le ngolon o le nyorrata o le nkibooroto e kewan”** (2 Tim. 1: 7). Ketii iltung’ana laa metem imbaa naaret kanisa oleng tenkaraki enkuretisho. Kake ore pee kipuo dukuya to Laitoriani nikiyiolou aajo keisho ninye iyiook engolon pee kias esiai enye. Naa keikash sii tinikitem esiai naje nikibatata alang tinimikitem katukul nikitoni ake nimikias esiai Olaitoriani te nkitieunoto.

Keyieu nikitem sii imbaa ng’ejuko oleng ata tenaa ineitu aikata etemi. Amu, eton etii inkoitoi kumok oleng neitu aikata kidamu pee kias esiai Olaitoriani.

Nikidamu aajo ore enikias iyiook taata teng’eno, teng’iriata, tenyorrata, te mborryon, o tenkitieunoto naa keidimayu pee eibelekeny dunia pooki. Ebaiki naa ore inkulie katitin kegol imbaa nejo sii oshi Ilmaasai inchere, *“Mearakinoyu enkare oloipang’i,”*<sup>44</sup> aa inchere meisimakinoyu imbaa. Kesipa ina Nduung’-

et erashe kake kesipa sii inchere ore pee eyieu Enkai neasayu entoki naje naa keasayu ata tenaa kegol oleng toltung'ani.

Ore apa aikata etii olupayian tenebo enkitok enye oata enkerai nabo. Neme ildakitarrini ninche. Naa keeta ina kerai emoiyian nagol oleng. Naa kegol oleng enkarna kake keji ALD. Ore ina kata meatai olchani obak ina moiyan. Nejo sii ildakitarrini ilarin are ake eton ebik ena ayioni pee eye. Kake etejo intoiwuo enyena ebaiki nikitum iyiook olchani ng'ejuk pee kibak ninye.

Ore ilkulikai tung'ani naa kejo meidimayu pee ebak intoiwuo enyena amu meetai naa olchani. Kake eshomo ninche dukuya te nyuaata oleng aaing'oru olchani o metabana ana netum. Nebak enkerai enye neikashu. Eton eeta enyamali amu etobiko erishata naje meeta olchani, kake eikasha tenkaraki ilo shani.<sup>45</sup> Netii sii video nalimu ina atini. Ore ilo shani naa keji "Eilata e Lorenzo's" amu keji ilo ayioni Lorenzo. Neaku, idolita ajo ore pee kiata enkirukoto nikiata eng'iriata naing'uaa Enkai tenebo enkitieunoto naa keidimayu imbaa kumok. Keidimayu pee kitem enkoitoi ng'ejuk neitu aikata etemi neretu enkishui ang aashu kanisa oleng. Matadamu enajo Ilmaasai pee ejo, "*Emut (kenya) olkurto enkop o metumuta,*"<sup>46</sup> aa inchere kenare nikinyok oleng nimikinauru amu ekibaya tiniking'iri. Neaku, matonyok aatem imbaa ng'ejuko nimikinauru amu keidimayu pee kibaya

ewueji ng'ejuk naretu iyiook. Ore pee kiyieu nikias imbaa sapukin te Nkai naa kenare nikias anaa enatejo Yesu te Marko 8: 34, ***“Teneyieu oltung’ani naasuj nanu, inchoo metanya inaayieu oltau lenye, nedumu osalaba lenye naasuj nanu.”*** Kegira Yesu aimaki ing’uarrat o ndamunoto naibok iyiook pee mikisuj ninye tenkitieunoto. Amu, ore inkatitin kumok tinikisuj iltauja lang ake nemeeta enikias amu ekiure oleng aatetem imbaa sapukin e Nkai.

Kake matadamu pee kias imbaa kutiti tenkarna e Yesu tenkoitoyi sapuk. Amu, tinikias ina, kemayian Enkai iyiook naa ebaiki nelotu erishata pee eisho Enkai iyiook esiai sapuk amu etodua ninye ajo ekisiligayu tina apa siai kiti. Kejo Ilmaasai inchere, ***“Eret Enkai looret ate,”***<sup>47</sup> aa inchere ore pee kiretu ate nikias nena siaitin kutiti neretu sii Enkai iyiook. Keretu Enkai iyiook ata tenkiterunoto enyuaata ang.

**Etabaua erishata tenakata** pee kisilig Enkai nikidamu indamunot sapukin nikiata enkirukoto nadotu ildoinyo. Nikinturraa indamunot torrok nikiaku iltung’ana ooata iltauja sidain, enyorrata, osiligi, induaat, o enkitieunoto. Keidimayu oleng pee kimbelekeny ena dunia tinikinteru aibekekeny ate. Ore pee kimbelekeny ate neibekekenya sii inkanisani ang neibekekenya iltung’ana kumok. ***Enkai nayiolo ajo k̄ainyioo naasayu tenaa aik̄ipuo duk̄uya aik̄o neijia ti abori enk̄itoria e Yesu nikias imbaa pooki te***

*nkirukoto, enyorrata, o eng'eno o tenkitieunoto.* Ekigira aaun iltung'ana. Nejo Endung'et e rashe nabo naing'uaa enkop e China, “*Tenaa iata enduaata naipirta olari obo tuuno enkano. Tiniata enduaata naipirta ilarin tomon tuuno ilkeek. Kake tenaa iata enduaata naipirta entoki nabik oleng tuuno iltung'ana.*”<sup>48</sup> Neaku, ore tena buku kigira aaimaki eunoto ooltung'ana amu ninche oobik intarasi tenaa kera ilairukok le Yesu.

Neaku, maape dukuya aanyok oleng. Nikipuo inkulie wuejitin aasipu inkoitoi ng'ejuko pee kitem sii iyiook. Kesipa kenare nikimpim inkoitoi ng'ejuko kake ore pee kitoni te wueji ang ake nimikipuo aasipu enaasita ilkulikai ebaiki nimikiasishore enkoitoi sidai oleng nanoto ilkulikai. Kejo Ilmaasai, “*Enkong'u naipung'o eng'en,*” aa inchere ore pee elo oltung'ani iwuejitin neepaasha netum eng'eno alang enoshi ake.

Ore pee iata enkuretisho tadamu Daudi pee ear ina tiamsi oji Goliat (1 Samuel 17). Amu, eisapuk oleng Goliat nemetii likai tung'ani oata enkitieunoto pee ear ninye leme Daudi ake. Kake etaara Daudi ninye te ngolon Olaitoriani tenkitieunoto oleng. Neaku, ore pee etii imbaa naagol oleng tedukuya iyiook matadamu aajo ketii Enkai tenebo iyiook. Naa ore pee etii Enkai tenebo iyiook kiindim aatimir intiamasini pooki naagira aarare iyiook. Nikiindim aataas imbaa enking'asia.

Tadamu ajo kainyioo iyieu nidol te kanisa ino. Mincho enkuretisho kimbok iyie. Mincho sii iropiyiani kimbok amu ebaiki tinias ina nimidamu aipanka eniyieu nidol tenkop ino. Keyieu Enkai nikidamu indamunot sapukin. Keyieu nikiata inkidetidetat sapukin. Ore tenebo eretoto Enkai ekiindim aaipanka imbaa neton eitu easayu neitoki nena baa aasayu te siadi tenebo engolon Enkai. Keyieu Enkai neasishore iyiook pee ebulu enkitoria enye. Nemeyieu Enkai nikinteleiki ilkulikae intiot.

Ore pee meloito kanisa dukuya tang'amai entioto ning'oru enkoitoi pee ilo dukuya amir inyamalaritin pooki tengolon Enkai.

Ore pee ipong'ori niomon Enkai nirridu nilo dukuya aisilig Enkai. Nintoki atem ai oitoti tengolon Olaitoriani.

Matadamu sii pee kiata eng'iriata tena siai amu ore pee kias aitobiraki nebik nelo dukuya teidialo iyiook.

Ore sii tenaa kesipa kenare nikisuj anaa enajo Ilmaasai pee ejo, "*Meoshoyu esipata emurt.*"<sup>49</sup>

Kayieu naiting'ie ena buku te nkomono nikiindim ataasishore pee kimbung nena baa nikiaku iltung'ana ooyietu ilkulikae tenkaraki enkishui ang.

**Metaretu Enkai iyiook pee kiaku iltung'ana oowang te wang'an e Yesu pee edol ilkulikae Yesu tiatua iyiook.**

Metodua iltung'ana pooki likitumore enyorrata e Yesu tiatua iyiook. Metaasishore sii Enkai iyiook pee eaku kanisa enye kanisa nayietu ilkulikai tenkoitoi esipata, olong'ur o enyorrata. Kiomon pee eaku kanisa ang enkitanyaanyukoto sidai metodua dunia pooki aajo ketii Enkai tenebo iyiook. Metaretu Enkai iyiook pee kiata induaat naaing'uaa ninye naashet enkitoria enye tena kop. Nikias imbaa pooki temberron o tenyorrata. Metaa ene Nkai enkisisa pooki.

***“Ore taata ilo laa te ngolon naisiaaisho tiatua iyiook eidim ninye ataasa neitulusoo oleng alang nena pooki nikinkilikuanu aashu kidamu, metaa enenye enkitoo tiatua esirit o tiatua Yesu too lporori pooki intarasi o ntarasi. Esai”*** (Efeso 3: 20-21).

Saruni Ole Ntayaia (Paul Highfield) July 2007/08 [(Olapa li opishana 2007 (2008 second printing) Nikirerioo 2013 neaku third printing, aa inchere enkitayunoto e uni]

## IMBUKUI NATAASISHORE TENA BUKU (End Notes)

---

- <sup>1</sup> George Barna, *The Power of Vision* (Ventura, California: Regal Books, 1992) 28.
- <sup>2</sup> S. S. Ole Sankan, *Intepen E Maasai* (Nairobi: Kenya Literature Bureau, 1979) 77, nampa 97.
- <sup>3</sup> Sankan, 82 nampa 187.
- <sup>4</sup> Sankan, 82 nampa 196.
- <sup>5</sup> Sankan, 77.
- <sup>6</sup> Sankan, 77, nampa 6.
- <sup>7</sup> Sankan, 79, nampa 64.
- <sup>8</sup> Ing'orai Barna, 70-74.
- <sup>9</sup> Barna, 73.
- <sup>10</sup> Sankan, 80 nampa 104.
- <sup>11</sup> Sankan, 78 nampa 49.
- <sup>12</sup> Robert Schuller, *Power Thoughts* (New York, NY: HarperCollins Publishers, 1993) 24.
- <sup>13</sup> Sankan, 78 nampa 46. Kake ketii ai oitoi natolimuo Menye Patita naa ina ataasishore. Kejo Intepen, "Melang olampu ilkeek aare."
- <sup>14</sup> Sankan, 81 nampa 152.
- <sup>15</sup> Keimaki Rick Warren ina bae te mbuku enye naji *The Purpose Driven Church* (Grand Rapids, Michigan: Zondervan Publishing House, 1995) 107.
- <sup>16</sup> Sankan, 79 nampa 86. Kepik ilkulikae tung'ana "nabo" tiatua ina kiyoroto hoo eitu epik Ole Sankan.
- <sup>17</sup> Schuller, 220.
- <sup>18</sup> Schuller, 115.
- <sup>19</sup> Schuller, 118.
- <sup>20</sup> Sankan, 79 nampa 79.
- <sup>21</sup> Sankan, 77 nampa 12.
- <sup>22</sup> Sankan, 81 namba 132.
- <sup>23</sup> Schuller, 222.
- <sup>24</sup> Sankan, 79 nampa 87.
- <sup>25</sup> Barna, 80-91.

- 
- <sup>26</sup> Sankan, 81 nampa 132.
- <sup>27</sup> K. P. Yohannan, *Come, Let's Reach the World* (Carrollton, TX. : gfa books, 1991, 2004). Neiger sii ninye ai buku sidai naji *Revolution in World Missions*.
- <sup>28</sup> Sankan, 78 nampa 54.
- <sup>29</sup> Keimaki Barna ina bae te nkardasi e 152.
- <sup>30</sup> Barna, George, *Turning Vision Into Action* (Ventura, California: Regal Books, 1996) 169-171.
- <sup>31</sup> Sankan, 81 nampa 143.
- <sup>32</sup> Sankan, 81 nampa 155.
- <sup>33</sup> Sankan, 80 nampa 103.
- <sup>34</sup> Sankan 80 nampa 119.
- <sup>35</sup> Schuller, 141.
- <sup>36</sup> Sankan, 78 namba 31.
- <sup>37</sup> Menye Patita, Olormaitai.
- <sup>38</sup> Sankan, 81 nampa 158.
- <sup>39</sup> Sankan, 82 nampa 171.
- <sup>40</sup> Sankan, 82 nampa 177.
- <sup>41</sup> Sankan, 83 nampa 200.
- <sup>42</sup> Sankan, 77 nampa 18.
- <sup>43</sup> Sankan, 79 nampa 68.
- <sup>44</sup> Sankan, 81 nampa 147.
- <sup>45</sup> Schuller, 143.
- <sup>46</sup> Sankan, 82 nampa 184
- <sup>47</sup> Sankan, 82 nampa 173.
- <sup>48</sup> Barna, George, *Turning Vision Into Action*, enkardasi edukuya.
- <sup>49</sup> Sankan, 81 nampa 140.

---

## **BIBLIOGRAPHY – (Imbukui nataasishore o nkulie bukui naaipirta ena kisoma)**

- Barna, George. *The Power of Vision*. Ventura, California: Regal Books, 1992.
- \_\_\_\_\_. *Turning Vision Into Action*. Ventura, California: Regal Books, 1996.
- \_\_\_\_\_. *Without a Vision People Perish*. Glendale, Calif. : Barna Research Group, 1991.
- Bredfeldt, Gary J. *Great Leader Great Teacher: Recovering the Biblical Vision for Leadership*. Chicago: Moody Publishers, 2006.
- Dale, Robert D. *Keeping the Dream Alive*. Nashville, Tenn. Broadman, 1988.
- \_\_\_\_\_. *To Dream Again*. Nashville, Tenn. Broadman, 1981.
- Gupta, Paul and Sherwood G. Lingenfelter. *Breaking Tradition to Accomplish Vision: Training Leaders for a Church-Planting Movement: A Case From India*. Winona Lake, Ind. : BMH Books, 2006.
- Malphurs, Aubery. *Advanced Strategic Planning*. Grand Rapids, MI: Baker Book House, 1999.
- \_\_\_\_\_. *Developing a Vision for Ministry in the 21<sup>st</sup> Century*. Grand Rapids, MI: Baker Books, 1999.
- \_\_\_\_\_. *Maximizing Your Effectiveness*. Grand Rapids, MI: Baker Book House, 1995.
- Morrison, Lavada R. *Where There is No Vision*. New York, NY: Carlton Press, 1965.
- Nanus, Burt. *Visionary Leadership*. San Francisco: Jose-Bass, 1992.

- 
- Oster, Merril. *Vision-Driven Leadership*. San Bernardino, Calif. : Here's Life Publishers, 1991.
- Robnett, Dr. Timothy and Allen H. Quist. *Spirit Driven Church*. Jun 13, 2006.
- Sankan, S. S. Ole. *Intepen e Maasai*. Nairobi: National Literature Bureau, 1979.
- Schuller, Robert. *Power Thoughts*. New York, NY: HarperCollins Publishers, 1993.
- Seth, Godin. *Unleashing the Idea Virus*. New York: Hyperion, 2001.
- Shank, Wilbert. *Write the Vision: The Church Renewed*. Valley Forge, Pa. : Trinity Press International, 1995.
- Shelly, Marshall. *Renew Your Church Through Vision and Planning:30 Strategies to Transform Your Ministry*. Minneapolis, Minn. : Bethany House, 1997.
- Stanley, Andy. *Visioneering*. Sisters, OR: Multnomah Publishers, 2005.
- Stearns, Bill and Amy. *2020 Vision*. Minneapolis, Minn. : Bethany House, 2005.
- Werning, Waldo, J. *Vision and Strategy for Church Growth*. Grand Rapids, MI: Baker Book House, 1983.
- Warren, Rick. *The Purpose Driven Church*. Grand Rapids, Michigan: Zondervan Publishing House, 1995.
- Yohannan, K. P. *Come, Let's Reach the World*. Carrollton, TX: gfa books, 1991, 2004.